



寒水齋先生集

十二

墓碣

廿五

~ 16
2420
12



和
2420
5-12



寒水齋先生文集卷之二十六



墓碣

佔畢齋金先生墓碣

嗚呼此密陽府西大洞庚坐之原卽佔畢齋金先生之墓也蓋先生之學私淑於圃隱而一傳而爲寒暄再傳而爲靜菴靜菴之後真儒輩出道學大振三韓一域蔚然爲文獻大邦夷考其功實由於先生有不可誣也 列聖之崇報士林之尊慕不亦宜乎先生諱宗直字季盥擢 天順己卯第嘗侍講 經筵辭 理明暢被 成廟嘉獎擢至上卿 恩顧彌隆而先

生逡巡不居退休桑梓以終其世訃聞 上痛悼忒甚隱典備矣其後南中章甫於先生杖屨之地建祠俎豆非止一二而朝廷皆宣額表章今 上已巳尤菴先生貽書相臣金公壽興建請于 榻前特贈領議政兼帶如例其節惠之典始在 成廟甲寅道德博聞曰文廉方正曰忠學士李龜所議上也其後改謚文簡未知何故而然也今 上戊子禮部因其後孫生員是洛之疏請還謚文忠 上允之 崇禎乙亥府使李侯惟達改設墓前儀物今按使洪公禹寧出財力重新之又歎舊表短剋而且以 貲贈之

由不可不備載將易樹穹石為垂永之圖其尊賢衛道之誠可謂至矣是洛之弟是淵以洪公命請文於尚夏屢辭不獲乃敢撮其略而書之如右前配昌寧曹氏梅溪公偉之姊後配南平文氏僉正克正之女有一子嵩年仕為齋郎不樂棄歸孫綸維紐克承先業號璞齋內外孫見存者并五十餘人朝廷以是洛奉先生祀特為錄用官至奉事於先生為七代也有孝友行曹夫人墓在金山米谷文夫人墓在陝川治縣俱 贈貞敬夫人先生世系事實詳於洪公貴達所撰大碑被禍首末俱載於國乘野史故此不著

郡守成公汝樵墓碣銘并序

商山之下洛水之濱聽竹成先生居焉學者尊仰之
其胤子諱汝樵字馨叔生於萬曆癸未四歲失所
恃事嚴君盡孝庚申丁外艱執喪踰制淚濕苦藁至
於腐傷聰明博學執贄於清陰先生先生期以遠大
爲文不拘俗人機杼庚申中庭試旣圻號考官以書
題有誤字啓請拔去上惜之賜小學一部公自
知數奇遂廢公車有遺世獨立之志於河洛先天陰
陽度數堪輿星曆占相醫方無不汎覽所謂三技九
流達其指觀發前人所未發又撰天機大要最關於

世用光海時權貴知公名重致意求見公以陳無已
之謝章子厚者答而絕之仁祖改玉公卿多是親
友擬將大用公以屈迹勲貴之門爲恥含章自守雖
在布衣人皆以公輔許之國有大事必與聞焉適
有妖人逮赴逆獄辭連誣人以及於公至對辨不相
指認蓋緣渠聞公名重欲援引冀免也然按獄之人
有不相樂者構誣他事論配江界無何量移海州放
還儕流推引始拜健元陵參奉後遷金井道察訪
時當丙子亂後驛卒盡散公多方撫綏散者還集厥
數甚多道臣狀聞特除韓山郡守晚築室于舟川

自號西岡老叟常以周易參同契置案上默契妙旨
素與尤菴同春二先生交誼深厚二先生以長德敬
之嘗論暮三百註尤菴贊其精切壬寅以大老推恩
授通政階其年四月二十五日以疾卒于第初葬于
州西高唐山後癸丑某月某日遷于俗離山龍華地
西坐之原同春先生誄之曰湖上論襟日懷鄉奉袂
辰天機通道法妙化自精神其許與如此蓋公義理
素明于中是非一定于心不以一毫毀譽動搖其操
守不以親疎貴賤低仰其評論以故善者愛重之不
善者敬憚之迴識獨見只用自樂不使人知雖自以

爲知公者或擬於奇花異草或稱以物外之士而已
其在江界也地僻陋夷習猶存公隨事教誨且倣擊
蒙要訣爲冠婚喪祭節目以教之風俗丕變其在海
州也當丁卯虜變賊騎猝至公乘舟避兵人皆競渡
公有善馬旣載而解使以濟人人皆多公之義昌寧
之成以麗朝中尹仁輔爲鼻祖其後道德文學代不
絕人爲東方甲乙族八代祖士達三重大匡集賢殿
大學士謚文孝討耽羅以功封昌山府院君出入將
相久掌文衡與牧隱諸公齊名曾祖諱希周承文院
判校才行名世與從兄領相希顏論議頗自異遂不

得大用祖諱世平江原道觀察使 贈左贊成有三
丈夫子伯仲位至卿宰季曰聽竹諱灑以栗谷門人
從事爲已之學作持敬指南圖事在浦渚趙相國所
撰墓碣妣南陽洪氏進士秀民之女内外家皆儒賢
婦德夙彰喪出漢京轎車在道而堅不可動時公與
仲氏纔離襁褓不克從柩聽竹曰是必眷戀兒子亟
使人負抱而來柩乃行見者莫不歎異公之配仁川
蔡氏直長有終之女判書紹權之曾孫仁川君壽之
玄孫寬恕謙恭閭範無違見稱宗黨先公二十七年
丁酉正月廿五日卒後葬與公同塋有四男二女男

震長縣監次震光震良震昌女長適李德邵次李東
野震長三男虎雄虎弼折衝護軍虎喆一女都事南
極杓震光一男虎兌三女郭摺進士李世泰蔡迴震
良二男部將虎贊虎三一女姜渭賢震昌二男進士
虎錫虎肅二女辛得中李檄李德邵四男時膺時晟
時素時騫三女生員金之紀部將成至重金逸煥李
東野一男增華縣監公側室四女沈若泗妾生員金
精鏐萬戶黃道弘武科李成彪妻也嗚呼以公之人
地才望宜其大顯於世以展厥志而官不過郡符莫
是命也歟余自幼聞公之高風心常慕仰晚與公適

曾孫遠徵厚伯善益知其所未知偉哉偉哉一日厚伯以公墓文見託義不敢辭遂摭狀文而為敘係之以銘銘曰

河洛圖書萬理之源唯易與範若會於元公契於斯靡不貫穿世無鍾期誰賞牙絃蓋公苦心致澤為期韞櫝不沽百未一施我佩之芳我命之奇有來千秋知者知之離嶽峩峩碧川洋洋我銘桓楹令名俱長

知事李公登墓碣銘并序

顯廟朝許積以加卜驟登相位時積之姦未盡露人不以為大駭獨掌令李公整抗疏直斥辭語凜烈

上震怒命竄極北賴大臣三司力救只命削黜後

積果誤國稔兇公之名益大著人比之呂獻可先見

公字子三我中宗大王別子德陽君岐之玄孫也

曾祖諱宗麟豐山君祖諱晬龜川君光海時有大節

謚忠肅考諱炯胤蓬萊君世以漢東平擬之妣崔氏

贈參判行之女以天啓辛酉六月四日生公幼

時氣宇異凡兒稍長聰穎好學忠肅公奇愛之甫成

童文藝大進屢魁泮試就學於澤堂李公李公亟稱

之癸未遇奇疾乙酉丁外艱哀毀幾危至辛卯乃赴

舉中司馬癸巳占謁聖第三名選槐院即拜說書仍

入翰苑爲檢閱適因事端敷奏明剴 上嘉納焉陞
待教奉教兼說書遷典籍移禮兵二曹郎出爲忠清
都事翌年歷兵郎司書正言文學又爲高山察訪吏
卒立石頌德戊戌 召拜正言己亥以兵郎上疏條
列北路民瘼仍陳救弊之策 上批嘉之廟堂悉請
施行北民賴之未幾坐罷 顯宗初敘拜持平時以
山陵事屢下 嚴旨羣情悶鬱公上章開陳 特
賜優答秋遞還舊職時宮家橫占柴場貽弊孔劇公
據法請罷又因冬雷上劄陳戒極言應天之道實在
修省修省之方不外於納諫用賢末又請委任 先

王春遇之臣 上虛襟聽納冬遞拜正言又上屢十
百言以正心勤學接賢爲要推以至於振紀綱和朝
廷養民力恤軍政言甚切實 答曰所陳無非至論
予當服膺俄以持平與同僚論尹善道嫁禍士林之
罪請按律處斷蓋善道包藏禍心已久至是假托論
禮欲害二宋先生其言幾於上變事機危怖人皆畏
避公乃敢言不顧聞者難之尋由禮兵郎復爲持平
事有不安避遞復以兵郎遷正言時兩南饑荒朝廷
別遣御史移粟賑貸公疏請盡數白給俾窮殘者蒙
實惠壬寅四月拜開城經歷公以優養爲幸而物論

不厭於外遷至官律已廉約聽斷公明一年三經北
差而應接中窳所費大省癸卯拜正言陞掌樂正再
爲掌令因災異請對極論宮庄之弊 上不答是年
舊恙復苦久處散秩乙巳論許積忤旨杜門廣陵之
松楸下丙午減門黜丁未蒙敘由是數年之間銓司
有窳輒擬而一向 靳黈公惶悚求外己酉始爲豐
德府使以親嫌卽遞又出爲韓山郡守以災傷見罷
蓋積黨爲都事承望修郤也辛亥丁內艱癸丑憂吉
由太常正拜執義甲寅遞爲宗簿正俄遷獻納復還
宗簿十年廢瘡之餘 恩命頻繁朝著莫不相賀無

何 仁宣大妃禮陟差 山陵都監都廳病遞拜司
諫執義并不仕尋以輔德拜執義當 顯廟大喪朝
行適無舍檢吏部郎欲壓堂下班公曰吏郎雖摠百
官自是該司中丞古之御史豈可序於該郎之下乎
雖哀遑之中事體不可不明文谷金相公以公言爲
得體已而遞付護軍公曰國之治亂罔不在初服首
先上章極言勤聖學拔人才廣言路培士類而尤憊
倦於革罷屯田變通軍政之策末乃引宋哲宗故事
請疏釋 先朝被譴諸臣識者以爲大有補於新化
時禍機已萌嶺人郭世捷受姦黨旨挺身投疏爲網

打士類之計一時洵洵無不駭怖公以司諫獨啓
請鞫辭嚴義正 上雖靳許而士論增氣冬館學章
甫爲儒賢上章伸辨而 天批極嚴公又以司諫極
論士氣不可摧折忤 旨遞職自是姦黨得志公不
樂在京乃築室揚州庄里揭以遁吉以見志焉庚申
時事一變公卽起廢爲司成轉司諫尋以持論寬平
獨停已發之論遞爲太僕正旋補清風府使朝議皆
稱屈而公無幾微色怡然之任辛酉入爲執義以
仁敬王后封陵官陞通政階拜工曹參議右副承旨
嘗因地震陳戒屢十言 上嘉納遞爲工戶兵三曹

參議甲子復爲承旨以病不拜未幾爲養病出守寧
越郡公以少日名輩棲遲僻邑尤菴先生嘗引世亦
棄君平語以歎之冬遞還歷兵曹參知參議工曹參
議己巳禍作斂迹杜門謝絕人事丁丑用大臣陳達
以 三朝近侍陞嘉善爲同知中樞戶曹參判選特
進官庚辰又以 孝廟朝翰林年八十筵臣有建白
者 特命超階爲資憲大夫知敦寧府事仍參耆社
是年冬因雷變 上召訪諸宰以應災之策公亦欲
赴 召子弟悶其老病而挽止公曰豈有 君父憂
災於上而臣子敢退坐乎且迹阻 楓陛有年若得

一瞻 天顏雖死不恨遂促駕登 筵爲陳消弭之
道 上念其衰老 筵席未罷 特命先出誠異數
也癸未五月二十四日考終于城東第享年八十三
計 聞撤朝市 賜賻弔用其年八月十六日葬于
揚州北面石積里午向原公元配 贈貞夫人全州
崔氏判書來吉之女天質柔嘉言笑不遠宗黨咸稱
其賢年三十六歿於甲午二月二十日祔公墓左生
三男二女男箕章箕明正郎箕翊持平女適翰林李
潤朝士人權和萬繼室貞夫人清州韓氏學生碩中
女英慧夙成婦道無缺愛養諸子一視無間生於乙

亥卒於戊寅三月十三日祔公墓右生一男二女男
箕獻庶尹女長早歿次適士人尹濩箕章一男著國
三女尹德老尹世觀次幼箕明二男著萬著大二女
權城進士朴重鼎箕翊三男著遠著瑞著成五女金
相尹文司書俞崇基朴弼濡羅瑞奎洪允輔箕獻三
男著德著徹俱進士著業一女金燿李潤朝一男命
臣三女趙光命縣監呂光周校理洪有人尹濩一男
相復歿四女李挺郁進士林薰餘幼內外曾玄六十
餘人公溫良愷悌一任天真而事所當爲奮發勇決
絕無骯髒色宅心清高俚談不出於口疎財尚儉覲

石屢空而處之晏如居家以行誼爲先與兄弟湛樂
每以不同居爲恨仁於講族如見其窮厄必思拯濟
立朝五十年章奏聯翩忠愛惓惓凡係 主違民隱
必盡言乃已嘗以斥邪扶正爲己任與仲氏司諫公
迭居臺閣風采振肅瞻聽聳動權貴斂避人以爲忠
肅公氣節不墜矣性嗜看書至老不輟爲文操筆立
就詩亦詞致典雅有著述若干卷藏于家公初入甥
館爲判書公所愛重一日明燭讀書判書與夫人臨
見袖田民別券而與之公辭以無名終不受判書公
嘉歎不已此雖微事亦足以知公也嗚呼以公之人

地早結 主知歷颺華顯安若大展而不幸沉病且
與人寡合其所進用常在吞吐間終使孤忠至誠未
施於明時豈非恨也雖然歷變履險冰玉無瑕齒爵
俱尊子姓蕃昌清名完福世罕其倫斯亦人人之所
願慕者又何憾焉余以故人之子周旋於牀下久矣
顧瞻今世知公莫余若今公之諸胤託以墓文有以
也何敢以不文辭遂略敘如右係之以銘銘曰
於赫龜翁柱天常曰有賢孫胚前光妙歲颺廷近
御牀直筆臺坡凜秋霜知無不言言必昌運丁陽九
捲而藏豈曰無時行路難人馳我後我愛間年高耆

社位卿班全吾晚節歿亦安鬱彼楊山閱衣冠有屹
桓楹名不刊

正郎尹公惟謹墓碣銘并序

仁祖乙亥太學發粟牛兩先生從祀之論主齋議者
皆一時極望而坡平尹公諱惟謹卽其一也時黨人
龔仁弘餘論百般沮敗雖號爲士類者亦多恇撓卻
步而公獨毅然不動斥出異論率多士叫 閤屢請
不已聲名震一世人莫不嘖嘖歎服焉公字而慎以
萬曆己亥四月廿二日生自幼明秀聰穎三歲而
孤稍長奉承慈教自勤勵爲學丁卯中進士拜 孝

陵參奉不仕又爲 恭陵齋郎歷平市奉事金吾郎
軍資判官刑戶曹佐郎正郎出宰義城縣爲政廉平
時繡衣李延年受賊積之唆必欲中傷而無覺可指
乃以壓良爲賤誣 啓及置對積曰嚮時驅逐多士
何其壯也今卒困此何如也論配永平縣後義民追
思公德惠上言白公之寃於是 上大悟盡罷積等
職 特命宥敘後爲戶曹正郎以疾考終于庚子十
月望日壽六十二初葬永平寶藏山後宗孫明采遷
窆于楊州先塋側負戍原公賦性清介志操貞剛事
親竭其誠孝居官一心奉公與人交不苟合言論風

旨多有聳動人處文辭瞻麗筆法神健先進之推許甚重間有通清之議而公則不屑與鄭進善濬李知事皆爲莫逆交每徜徉於水石之間人皆艷之坡平之尹以麗朝壁上功臣萃達爲上祖門戶盛大爲東方甲乙族王考諱仁涵參判有允菴先生所撰行狀世系詳載考諱弘毅文正郎妣順興安氏忠義衛尚忠女公初配 贈持平崔有涵之女早承庭訓克遵女範有一男起卿女適李緒後配安東權氏都事必中之女 贈領議政峽之孫爲婦爲母俱有儀則追遠盡其誠且不信巫卜妖說生於癸丑歿於己巳十

月三日與公同塋生四男時卿濟卿致卿五卿三女適縣監徐文在安處基李聖民二房男明啓女金聖溥洪震杓三房男明采爲長房后次明大四房男明教明會女朴壽得五房男幼女李震遠李燭外孫天哉天遠安脩會玄男女摠若干嗚呼以公之人地才望空若大振厥聲而崎於一第位止潛郎豈非命也然乙亥大論有光斯文至 今上朝終允所請皆公始事之力也傳之簡策令名無疆其與一時金紫名湮滅而不稱者顯晦何如也余先祖府使公亦名進士與公同爲乙亥齋任世之稱頌者蓋并美焉余自

髻鬣蒙公撫頂之恩猥荷嘉獎至今想仰風範有如
昨日事今明采甫以其先大人命來乞墓銘何敢以
不文辭遂就其狀隳枯而爲序銘曰
衆方骫骳獨揭揭兮正論是賴邪遊迹兮大禮卒舉
名益烈兮我撮其大餘可略兮

郡守

贈贊成趙公禧錫墓碣銘并序

故大司寇 贈領議政忠靖趙公 孝宗朝股肱蓋
臣也有五丈夫子多貴顯於朝獨其第三諱禧錫個
儻好氣義數奇不第年四十一以槐山守終於郡一
隊交朋咸嗟惜之公字享久生於 天啓壬戌十一

月九日豐貌脩幹姿稟魁特人以遠到期之庚寅司
馬癸巳筮仕拜敦寧司饗參奉乙未丁內艱服闋爲
水庫別檢水官舊無公解至寓直村閭公檢得所屬
隱畝之稅初設廳舍以此有陞敘 命遷司饗直長
陞主司宰簿己亥 大喪以司僕主簿兼 山陵郎
廳監董得宐功在人先則輒移他掌蓋才公也時天
甚寒石役重僧徒不堪怨咨思潰公察知之謁堂上
請變通諸公曰郎怯矣潰將何之居數日果盡散諸
公罔措詣 闕待罪 上患之欲退葬期且問於鄭
相致和曰豈無及期辦事者乎鄭相對以公於是別

設輸石所差公獨運公以計招諭僧徒感激爭先聽命由是 大葬如期 上教曰趙某才且勞其命陞資鄭相太和曰某方業公車一第早晚事遽爾陞資可惜 上曰果才也豈無別爲調用之道曰雖有特教本朝蔭路窄難盡其用莫如姑施他賞以故命授四品職戾子擢拜槐山時歲荐饑道殍相望公莅官未久得穀數千斛以濟之傍邑之民亦聞風仰哺所全活甚衆人有勸報按察者公曰嗟乎吾豈報功要賞者言者慚退會灣尹缺廟議欲屬之公不果壬寅感疾以九月四日不起一境髻白號慟官門亦

多有奔走隨喪者從日家言權厝木川納安里越明年葬壬坐原後用子泰采恩例屢 贈至左贊成公孝友篤於家庭信義著於朋儕遇事風生談論溢發出謀發慮動中機括忠靖公時或詢叩疑事對之沛然忠靖每稱其才器之過人居家不事產業常存心於愛物其寓湖中也有海西士人失馬未歸彷徨歲餘公憐之以所騎與之其人感泣後歸馬直謝不受又有嶺南人幼失父母流離京口公見之惻然攜歸而衣食之教訓成就以至有室戾子之饑斥所居舍取五十白金將以謀食見相識者不食有日損其半

與之不責報其急人之難多類此聞者義之公未嘗
嬰情於得失榮辱視世之翕翕熱者若將浼焉嘗曰
吾門戶盛大宜以招損爲戒每欲歸去湖庄與村翁
野老婆婆水石之間而卒未就焉趙氏貫揚州以高
麗判中樞院事岑爲上祖自是簪組蟬聯至文剛公
末生則是我 世宗朝名臣也會祖諱擘 贈左贊
成祖諱存性知敦寧 贈領議政諡昭敏忠靖公諱
啓遠妣平山申氏其考象村文貞公諱欽也公配水
原白氏僉樞弘一之女休菴公諱仁傑之玄孫貞靜
和順未嘗有疾言遽色事尊章無違御家衆有恩忠

靖公嘗稱曰晚享福者此婦也在槐衙數年一毫未
嘗累公生於癸亥十一月十六日歿於己丑十二月
三十日與公同塋舉四男泰來都正泰彙郡守泰果
僉樞泰采冢宰四女適奉事李滌士人黃峻郡守李
齊尚縣監韓璠側出男泰雄泰觀女爲及第鄭伋妻
都正男行彬副率道彬應教郡守男斗彬縣監奎彬
進士箕彬女鄭道謙僉樞男興彬女吳命瑞李垓李
幼冢宰男鼎彬觀彬皆進士謙彬女李廷煥朴舒漢
李幼外孫李秉天奉事出李相晚相顯相晟郡守出
韓尚愈縣監出泰雄三男泰觀二男內外曾玄摠九

十人公仲氏觀察公哭公之文曰揣事則逆未至而
覩將來當事則握其機而中其竅遇至難而不疑履
至危而不怖見人窮而周之則施舍無吝許人交而
結之則輸瀉無隱又曰見人之昵昵沾沾逞嬾孺態
色者則不肯并立而語又曰開豁之抱快俊之姿出
人之慮拔俗之辯人莫敢以常儔凡匹待之此天倫
間知己之言也縱使余別有揄揚又何加焉顧今之
世道委瑣齷齪利欲滔滔如公之傑鉅丈人何處得
見乎嗚呼唏矣昔余以故人之子侍公於樽俎間日
月多矣知公之詳者莫余若也今冢宰公之屬余以

銘宐哉何敢辭爲其詞曰

義高當世智周物兮無難不易若河決兮視金如土
貪夫但兮快翮將騫年壽閱兮天冥隲之景禧發兮
蘭茁芝秀爛繡黻兮宰如斯丘閔英魄兮于篆桓楹
詔千億兮

掌令尹公遇丁墓碣銘并序

先朝學士大夫氣象近古處臺閣者多以骯髒爲淡
恥敢言爲已任若故掌令尹公其著者也公諱遇丁
字士衡以 天啓丁巳十二月六日生幼聰明好讀
書嶷然超出曹偶八歲里人會射長者命公綴句公

卽對曰當晝月暈不夜星馳衆皆奇之及長以辭賦大振文人才士皆願一識壬午中司馬名重賢關甲申遭內艱癸巳春拜金吾郎七月丁外憂丁酉以典設別檢例遷司宰直長庚子從金吾郎陞工曹佐郎冬出監咸悅縣一切以清約律身而行之以仁恕宿瘼如洗民莫不父母之時當大比設場於縣舉子以考官之失體羣起作拏公以禁亂官多所周旋不至罷場而猶不免臺論坐罷而歸髻白攀轅泣別樹石以思之壬寅敘授工曹轉戶曹十月擢庭試文科歷禮兵二曹郎兼春秋拜司諫院正言時兇人尹善道

假托論禮嫁禍士林 上震怒安置北邊洪宇遠以玉堂官營救善道公請削宇遠仕版遞移騎省再爲司憲府持平時兩司并論諸官家及宦寺不法事連被 嚴旨公力諫乃得解又嘗與諸僚入陳弭災之策惓惓以親賢臣講治道爲先又請祭享之物嚴飭精備 太廟儀物之傷破者一齊修改皆蒙嘉納又上疏極論君德朝政 批曰請對之外更進所懷憂愛之誠予甚嘉之公久在臺省刺舉不避貴近朝右肅然甲辰四月得奇疾再授掌令辭遞六月拜京畿都事以十二月十七日考終于正寢壽四十八是日

復有掌令 除命而公不及知越二月權厝于高陽
先塋側丁未永窆于沔川治北駐節洞未向之原後
以子貴 贈吏曹參判公溫雅介潔簡默自持兒時
遇果品不敢先嘗必獻祖父母若父母四歲遭王考
喪悲慼如成人宗族咸稱孝兒丙子之亂奉三老親
往避湖中雖傖荒奔迸之際甘旨不乏前後居憂哀
毀盡制幾危獲全友愛篤摯一妹有不得於夫家者
公與共衣食至析箸擇與田民撫養庶弟妹無間貴
賤從兄邁毒癘公悶其不汗達宵共衾朝已不可爲
矣時當寒凜盡脫衣衾而斂之友人死於癘公往哭

之恤其老幼每見窮人乞兒輒傾橐而周之蓋自少
時已然也教子姪以義方族子之有才者亦舍養而
訓誨之接人以恩咸得其歡心及喪無不痛悼如親
戚再登瀛選漏於都堂鄭相公太和聞公歿嗟恨曰
此君從蔭仕擢第未久吾嫌其驟進終未引致於
經幄也少時嘗夜讀書客有來言曰逆獄將起必有
別試君何不製而讀耶公峻責曰何其虛妄也仍讀
書不輟後有上變者客亦與焉廣引嘗與語慶科者
至舉公問答之辭有司請拿公 孝廟特教曰勿逮
也責其虛妄何言之可問至今人稱 聖祖之明睿

而亦見公平日言行之慎重也恭原之尹以高麗東
北面都指揮使松磾爲上祖代有大官入我朝有
曰碩輔燕山朝以直提學直言流配後選清白贈
吏曹參判高祖諱儼監役曾祖諱誠贈承旨祖諱
自莘文正郎考諱有吉郡守兩世俱贈參判妣
贈貞夫人豐山任氏宣教郎瑄之女也公之配龍仁
李氏其考開城畱守後山也事尊章以孝奉蒸嘗以
敬處娣姒宗黨之間恩意洽然咸頌婦德家甚貧寒
而能於無中辦有人不知窶色屢享專城之養而一
心儉約凡遇事洞然處之無礙雖有不平事絕不見

邑辭真古所謂女士也生與公同年歿於乙丑九月
六日祔公墓左舉五男一女男致績兵曹佐郎敘績
戶曹正郎凝績學生嘉績觀察使景績判官女適判
官朴泰輿曰志淵志源佐郎女壻李萬模長房出志
任郡守志和正言志淳進士志益縣監女壻師傅柳
鳳協二房出志大縣監女壻參軍李衡秀三房出志
浩進士志溟女壻觀察使李晚堅庶女爲府使沈齊
賢妾四房出志述進士女壻進士閔遇洙季房出外
孫弼莘弼傳二女歸修撰李真望呂慶周曾玄多不
盡錄嗚呼以公之高才雋望得遇明時空若平步亨

衢大究厥施而天閔其年未展萬一儻所謂命也歟
然其清名直節足以流光於來世而後承蕃昌福祿
未艾理之可徵者其在斯與余先子執義公嘗與公
交誼深厚以故余於少時亦嘗拜公於牀下景仰其
風懿後與公諸胤交誼甚篤益聞公制行之美今其
墓木已拱而諸郎亦幾盡零落撫往傷今悲不自勝
乃者判官君以狀授余託以墓文曰顧瞻斯世知吾
先德者莫子若也仍泣懇不已余雖不文義何敢辭
謹撮其狀敘次如右係之以銘銘曰
於赫尹公金玉章晚結 主知近御牀諤諤昌言凜

秋霜 王曰嘉乃進塗揚飛不盡翰奈彼蒼遺風未
沫令名長孝子翼翼碣玄堂我筆不媿詔無疆

參議洪公錫箕墓碣銘并序

世稱近代文章士必曰晚洲洪公以余觀於晚洲文
章特其餘事也嗚呼粵自甲申以後九有腥膻天下
不復知有 皇明而公獨奮筆爲文擬檄中州其慷
慨激切之氣直衝乎幽薊燕雲之間雖天不我與卒
歸於空言使後世知我東徧有此議論精神者未必
非此文也何其烈也華陽先生高其義尚其志至期
以十襲珍藏誇示 中朝將相於 天日重明之後

觀乎此亦足以知公之所存矣公諱錫箕字元九晚
洲其號也以萬曆丙午十二月二十日生幼有異
質穎秀邁倫四歲能屬文見者奇之稍長從具洛洲
鳳瑞學出語輒驚人聲藹蔚丁卯中進士補章
陵參奉辛巳拜戶曹佐郎是歲擢庭試第一遂拜兵
曹佐郎仍入諫院爲正言者凡七八而常帶三字銜
乙酉上萬言疏忤當路意出爲海運判官有一名官
宰屬邑公繩以法不少饒因此謗言朋興坐罷落拓
者幾十年甲午拜禮曹正郎又擢文臣庭試卽授仁
同府使臺諫以驟陞劾免丙申除成川府使卽遞爲

良才察訪戊戌拜刑曹正郎不就已亥守丹陽郡郡
地僻岷蠶公力行文教士風丕變民追思豎碑辛丑
爲養爲結城縣監秋丁憂服闋拜禮賓寺正乙巳除
海州牧使公素與本道方伯徐必遠有隙會有強盜
捕戮必遠啓聞公陞通政陽若褒顯而陰實困滯
之也公揣知其意遂移疾歸丁未爲舒川郡守顯
廟幸溫泉以差員勞特除濟州牧使筵臣銜其
右遷啓請不遣己酉爲靈光郡守以監司金澄壽
宴事株連劾罷踰年復除成川府使公已不樂於仕
辭不赴未幾除南原府使黽勉赴任秩滿解歸于上

黨之板橋尋入檢丹山得崔孤雲舊遊處築小亭扁之曰後雲取後世孤雲之意也角巾道服日相羊其中悠然不知老之將至於世間一切名利得喪榮辱泊如也後雲之距華陽門下一舍而近公暇日肩輿數相往來畱連探討劇談古今又其傷時悶亂之語屢發於文酒之餘慨然有朱夫子樓下永歎之意先生益感公所存託為歲寒之交凡於感慨不平之際輒發於吟詠前後唱酬殆至數十百篇頃之時事大變公居常悒悒益無當世意許積與公有素移書囑以美遷公峻卻之作詩以見志人或危之而終不懼

焉公於病中慨念時事草疏屢千言罪狀時輩將上而親舊交謁更諫公歎曰古人遇遯之焚豈無以也病益欲事遂寢臨終使子弟告于家廟曰為子不孝為臣不忠死無可惜告訖翛然而逝時庚申二月二十六日也臯復前數日始拜刑曹參議命至而已無及矣是年七月某日葬于州東酒谷枕亥之原夫入金氏祔焉公眉宇疎朗氣度清爽而性篤孝六歲母夫人捐世公常以早失所恃為至痛見人有雙親者泫然有泣下時事父生員公至誠無違體志俱養在結城時一日心動疾馳歸省則生員公病已數日

矣得侍疾終孝鄉隣異之事庶母以誠周內外窮族甚厚洛洲歿無嗣公竭力經紀葬祭以禮致其一事之義自少聰明絕人詩史百家一覽輒成誦故文詞敏給水涌山出同時如東溟鄭公松谷趙公或讓其一頭素性亢厲不事權要逮至甲寅以後永矢卷懷閉門卻掃時於風花雪月之交宣其壹鬱侘傺之思音調清越辭旨悲惻若將爭高於秋色士林莫不傳誦公所著詩若干首選入箕雅晚洲集數十卷尊周錄一冊藏于家公南陽人高麗太師殷悅之後簪組蟬聯屢百年不絕至諱繼姓諱濬皆隱德不仕是為

公高會兩世也祖諱純愨文科同知 贈判書生員公諱頤中妣固城南氏縣監忠元之女也夫人某氏安東大姓 贈承旨璵之女生先公一年歿後公三年舉一男曰一字進士側室三男一鼎一泰皆武科一載僉知進士二男冑煜進士冑燁三女適主簿徐文澤縣監李秀文士人郭再泰內外會玄不盡錄嗚呼以公之人地兼之以絕世奇才空若主盟詞壇大振厥聲而與世抹掇進塗常在吞吐間低徊郡符飛不盡翰豈非命也然士君子苟非先立乎其長者文章直土苴耳公早講春秋服其大義寤歎吟嘯莫非

京周之念至使老先生許以心交其所獎詡足以不朽於百世其視世之生極其榮而歿無所稱者得失何如也余嘗拜公於洛下竊仰其長德風儀及遊華陽益聞其平生心嘗傾慕之不衰今公之曾孫進士泰屋以公墓文見託余何敢以不文辭謹撫其狀而爲之敘係之以銘銘曰

孤雲一去後有雲兮超然物外繼清芬兮獨抱幽琴
遇賞音兮人遠山空迹已沉兮我銘桓楹詔來今兮

僉正韓公志遠墓碣銘并序

粵在 宣 仁朝有若右議政清平府院君韓公諱

應寅以柱石大臣策勲開封有若文元公沙溪金先生諱長生以斯文適傳爲世師宗寔於公爲內外祖也考諱德及清寧君有三丈夫子公其季也諱志遠字子尚生於 泰昌庚申十二月十四日幼時雋偉異凡兒及長氣宇軒豁不屑屑於科第進取己亥九菴先生爲冢宰大恢公道舉公爲 南別殿寢郎庚子辛丑荐丁外內憂乙巳復 齊陵參奉戊申換慶基殿例遷司饗奉事直長辛亥陞司道未主簿遽爲活人別提尋以司僕主簿壬子拜和順縣監政先修舉威懼姦強不多時風采立變歲旱禱雨輒應人異

之時姦黨仇視宋先生以公嘗見知於先生臺臣構捏三啓而罷後爲幹川又見忤於賊鑑道臣希鑑指斥黜邑民千餘輩訟於籌司而不能得庚申蒙敘辛酉監恩津縣以親嫌遞秋拜江西縣令櫛去宿瘼威惠大行監司以微事置下考後監司亦悔謝癸亥三月爲尚衣主簿四月移平市令六月陞尚衣僉正時李相國翮長銓常以公棲遲爲惜調遷頻仍金相錫胄以驟陞論遞冬拜平昌郡守政簡民安一境歌頌偶患風痺丁卯賦歸以九月十四日考終于京第壽六十八初葬南陽飛鳳山辛卯遷厝于廣州月谷

面鱗峴午向之原公立心正大處事剛果義所當爲不以利害撓奪綽有古人風致居家制行多有人所難及者其奉親也怡愉恭恪無故未嘗一日離側及其有疾則未嘗解帶病欲嘗糞驗其吉凶及喪哀毀動傍人事兄姊誠愛篤至撫恤諸姪孫曲有恩意常聚會一室相與歡樂在官雖疎遠之族歸之如家韓門之以睦名世實以公也喜施與接人以誠然見不善未嘗少假人以是莫不愛而畏之屢典郡邑清約自律解歸或至屢空而不以爲意當官處事必以公明而亦不爲皎皎之行以自銜於世古人所謂眞士

夫者公實其人也上黨之韓以麗初太尉蘭為上祖
入我朝議政確生昭惠王后於是益大著間稍
不振至清平公贈其祖諱侑贊成考諱敬男議政
公之元配恩津宋氏掌令希進女早歿葬公州沙寒
里後配令人慶州李氏郡守大廈女事舅姑接妯娌
誠敬備至公之孝悌敦睦實令人之內助為多後公
六月而歿與公同塋男長聖揆次聖一時為比安縣
監二女適黃銑金性豪比安男配箕為長房後次配
斗生員次配奎女金一運黃壻繼子振河金壻男礎
女李顯允內外曾玄若干人余先子執義公與公同

庚交諛頌款余亦自少拜公於牀下竊仰公風懿今
比安君來謁墓文義不敢辭謹據其狀略序如右銘
曰
用公者誰也極公者誰也以此觀公不難知也志大
迹屈數之奇也誰之不如而止此也孝子翼翼思闡
美也我筆不媿篆于隧也

執義李公箕洪墓碣銘并序

往在光海癸丑賊臣弘瞻等倡讎母之論彝倫斃塞
宗室龜川君晬抗議叫閭竄逐南荒泊今上巳
巳兇人大運黯等構煽大禍坤殿遜位時則龜川

之曾孫箕疇與吳公斗寅等上章力爭逮尤菴宋先生以三朝賓師不免於及則又率同門士四十餘人伏闕丐命遠謫北塞人皆嘖嘖歎曰是何純剛至正之氣萃於公祖孫也箕疇是公初名後改箕洪字汝九我中宗大王別子德陽君諱岐之五代孫也德陽之孫卽龜川諡忠肅忠肅生蓬山君諱炯信蓬山君生副司果諱塾寔公之考也妣礪山宋氏其考郡守鉉也公在娠宋夫人有異夢以崇禎辛巳丑月四日生穎悟超羣兒稍長就師數年間讀盡四書二經弱冠有意爲己之學從李恥菴之濂講小學

心經近思等書李公亟稱之乙巳始拜同春先生於懷德間爲學之要又請業於尤菴先生質近思通書太極圖疑義仍問丁丑後應舉當否先生曰朱夫子當南渡後亦嘗應舉蓋志在復讎也今若以夫子之心爲心應舉何妨公服膺不忘某年一入試園中發解及赴覆試事有不如意者折券而出遂不復就同春先生聞之謂能知取捨輕重之分寄書稱道又答公論性諸說曰妙年見識已如此他日成就何可量也庚戌宋夫人疾斃公八月不解帶及喪致毀幾不全甲寅與同門諸人訟尤菴寃及先生竄北亦如之

仍入加平峽中杜門謝世學者頗從之丁巳告廟
啓發公袖疏詣闕門上意洞燭羣兇斂縮遂不
上庚申夏化公卿多薦公學行聲聞益播冬丁外艱
翌年又居蓬山公憂哀慕如一而禮制無憾服除大
臣又薦經明行修丁卯授孝陵參奉公念宗戚之
臣義與巖穴有別遂應命無何羅良佐上疏侮辱尤
菴公欲辨之自齋所卽入京有掣肘勢不果仍呈病
遞職蓋自尹拯背師之後人心大異於前公不勝慨
惋屢以書開曉於士友間至於玄石朴公則又責其
待羅之不嚴焉戊辰春朝廷選經學士使入筵席

公與焉已巳除司圃別檢不就時世道又大變尤菴
枵棘於濟州已而又請拿鞠蒙允公涕泣悲憤不
忍含默時火色彌天一言出口家族立碎親黨交謁
夏諫而公不聽曰今師門禍慘吾豈忍愛死疏上
上下下備忘極嚴遂配會寧人莫不代怖而公怡然就
道到鏡城聞尤菴受後命失聲大慟如不欲生到配
端居靜坐唯以書籍日孜孜焉士有來學者隨才而
應之邊俗昧於禮聞公言而不變者多矣辛未疏決
上特舉公名曰爲師訟寃其令減等遂降爲徒癸
酉放還甲戌上大覺悟朝著始清明銓長請收用

為儒賢得罪者 上又曰其謂李某等耶亟令西敘
時玄石在朝欲汲引遺逸稱公為宿望公又被宰臣
薦拜侍講院諮議屢疏辭 上批隆重乙亥陞主宗
簿簿謝 恩卽遞丙子朝家選 世子書筵官公又
與焉上疏辭 優批不許且以別諭促召會以臺言
罷之蓋臺官之意別有所指非在於公而公則以是
固辭焉未幾除司憲府持平屢疏辭遞尋為通川縣
監公念古人辭內居外之義遂拜命時歲大饑道殍
相望公竭誠煦撫所全活甚多又畱心教化擇子弟
之秀者聚而教之如明道晉城之為一境風動丁丑

以方伯親嫌遞歸士民樹石追思戊寅除掌令辭遞
庚辰又以掌令遞拜清風府使其政教如通川時壬
午以掌令承 召因辭疏極陳恤民之要而以人主
之正心術立紀綱為本又請蠲民間逋糶又請大同
及軍布依詳定減布數又請復良民從母役之法
上嘉納之公又辭不赴遂定居于延豐之文山以為
終老計又築一小亭于縣東仁智洞扁以壽樂徜徉
其間蓋取朋遊之樂與夫水石之勝也又以暇日入
華陽洞拜老先生遺像又行享事于 皇祠以寓感
痛之懷癸未陞執義時有李廈成之疏誣毀尤菴甚

慘公疏辨被誣本末 上優批甲申再爲執義疏略
曰臣竊伏聞 殿下追思 神宗皇帝萬世不忘之
盛德既下立廟之議又行壇祀之禮凡在含生孰不
感泣臣妄揣 聖上之志不但在於此而已將見繼
此而以圖尊周之實者靡不用極仍節元菴丁卯疏
以進畱疏不下又疏陳去已私恢公道之意 上亦
嘉納自此至丁亥凡六爲執義一爲掌樂正皆不就
然大諫洪萬朝之疏論及元菴語不遜修撰蔡明胤
亦上疏侵辱栗牛兩賢公因辭疏辨之 上皆優批
戊子冬感疾頰彌畱臘月初三日是喪餘病不能與

祭猶強盥洗向廟大慟由是病遂革以戊時終壽六
十八越明年二月葬于楊州之臺山其原向未蓬山
墓在其上淑人潘南朴氏通德郎世墳之女冶川先
生紹之五代孫也生先公一年歿先公七年與公同
塋端重寡言事舅姑能孝奉君子無違禮隨公之兩
邑一毫未嘗累公婦德咸宜有四男著顯著先著定
生員著聖二女適進士金有慶鄭泰河著顯無子以
著先次子允濟爲後二女元一揆尹勸著先男民濟
女崔命傑餘幼著定男弘濟餘幼著聖男女皆幼金
壻男漢明女李希益俞直基鄭壻男女皆幼內外曾

玄并幾人公天資樂易而處事剛方早有向裏之工
又得大賢爲依歸故立心制行粹然一出於正性至
孝常懷風樹之痛每遇官供甘旨有餘則必涕下居
家有隱德至行實多人所不及處有庶母難事能以
誠感化三弟早亡撫恤孤寡必誠推以至於黨族曲
有恩意咸得其歡心待人不設畦畛雖嚴師畏友無
有所隱尚儉約厭紛華於一切世味泊如也每淨掃
一室清坐終日氣像閒雅翛然有出塵之想也其爲
學窮研實踐內外交致於洛閩諸書用力益專尤菴
先生嘗與公論學而曰不意臨死之年乃得吾汝九

與論此事非少幸也及在海上貽書告訣於門人仍
以劄疑之修求助於公其相與之淡可見也公嘗問
終身可行之道先生曰天地之所以生萬物聖人之
所以應萬事直而已矣此朱夫子易箴時誨門人者
也蓋勉之哉公尋常體行在北時遂名其所居室曰
直齋學者仍以是爲號有文稿若干卷自省篇爲學
方續等書藏于家噫老先生之所以教人者如時雨
之化一世之人孰不霑濡而至今門下諸人靡有少
承厥志者獨公能不負直字之訓其所樹立若是其
炳然以不墜名祖之家傳而益有光焉嗚呼賢矣哉

公不鄙余鹵莽猥以道義相許與近又密邇遊從數相講劄知公之久而服公之深者宜莫如余也今諸孤來乞墓文顧何忍以不文辭遂爲之銘銘曰

大哉允翁晦父適相傳有符一字直公聞厥旨熬用力用之伊何明誠學施於民社人誦藥肥遜丘樊介如石唯彼卓節歲寒栢令聞長世繼忠肅

縣監

贈參判韓公

如海墓碣銘并序

國家丙子之恥尚忍言哉甲申以後神京淪沒海內腥膻而金珠皮幣往來不絕嗚呼得不哀痛士生斯世有能超然遐舉不獲滋垢者蓋難其人而唯晦軒

韓公殆庶幾乎公諱如海字浩浩生而岐嶷異凡兒廿七中司馬遊太學以立揚當世爲期及丁丑媾成隱痛于心遂廢公車託迹湖山有遺世獨立之意己亥補禧陵參奉庚子除連原察訪戊申朝廷交薦公學行孝友才局復因筵臣陳白陞六品己酉拜衛率庚戌授鴻山縣監工曹佐郎皆不仕辛亥除禮山縣監時朝議欲處公以臺職故黽勉一行以避之到官卽辭疾歸甲子復除工曹佐郎不就丙寅文谷金相公白上以韓某操行過人甚有名稱曾在先朝超授縣宰此人不可待以常調今年過八十空有

優老特典 命加資付護軍旋授僉樞朝中知舊促
其來謝 恩命公謝以老病癸酉正月五日考終于
正寢享年八十七始葬驪州地後七年己卯十月三
日改葬于忠州北村高山臺下負卯之原先兆也後
因睡村李相公陳白其明見卓節特 贈戶曹參判
公天資甚高學懋爲己居敬窮理一如洛閩規矩常
謂藏名晦迹可免於亂世學問之名尤未易當未嘗
從師求友與人講說故所造深淺人不得以知也然
襟懷坦蕩操履謹嚴充養既久發於面貌望之知其
爲有德君子也性篤於孝友八歲喪母夫人哀慕如

成人事先公極其誠志物之養備至及遭艱哀毀踰
節泣盡繼血衣席染腐朝夕哭墓風雨寒暑不廢一
弟從宦在京常以睽離爲恨至老招歸共居江庄扁
其所居亭曰二老以盡暮年怡愉之樂恬於財利辭
受必謹伯母申氏早孀依公公生養歿祭無不盡誠
申氏兄弟感公之義以其庄土歸公公卻不受前夫
人有私財亦歸之本家雅好山水聞人說勝槩輒悠
然起想復欲長往所居亭舍在漢水上流素稱名區
奇巖削立長松偃蹇俯臨清流斜對翠巒蒼顏白髮
杖屨其間翛然獨出乎塵表望之若神仙公未嘗求

知於人而人自推服同春宋先生嘗曰自古遺逸之士多出於草野窮約之中而如某者以世祿之家負公輔之望其才地足以坐致卿相而顧乃舉足高蹈潔已終老斯人豈易得哉允齋宋先生亦曰獨善豈易事丙子後守節亦豈小事業後世傳述者當以清節名之觀於此亦可以知公矣蓋先生始未知公公先言尹鑄當禍士林後果驗先生淡服其明而譬之於呂獻可云公上黨人高祖諱克恭別提 贈左承旨曾祖諱天賚生員 贈參判祖諱孝仲左承旨 贈判書考諱必厚典籤 贈左承旨妣淑夫人慶州

李氏鷄林府院君守一之女公初娶廣州李氏進士光業女無子後娶慶州李氏士人尚逸女舉三男長載箕生一男宗朝三女幼次用箕生三男謇朝憲朝餘幼次遠箕生三男皆幼側室子振箕生三男翼朝緯朝羽朝二女幼嗚呼公偉器俊望空若有為於斯世而遭時不幸遯迹林壑以卒其世天之生斯人也果何為也然其所自樹亦足有辭於來世而與有助於天經地義其視世之無其德享其祿而名湮沒不稱者何如也唯辛亥一出人或疑之而畏避名途志則有在倘不為邵堯夫之打乖法門則亦不過為陶

徵士之彭澤一行後之尚論者何可以此而輕議也
耶余嘗拜公於牀下景仰高風者久矣今當墓文之
役何可以不文辭謹撫狀文敘述如右係之以詞詞
曰

西山漠漠兮採薇歌殘東海茫茫兮高躅誰攀時丁
百六兮四海昏蒙有一介於三韓兮灑落晦軒之清
風

郡守 贈參判俞公希曾墓碣銘并序

公諱希曾字勉叔以 萬曆甲申十二月十五日生
自幼舉止異凡兒九歲遭壬辰亂數還賊山谷間賊

異公狀貌輒釋之十歲丁外艱哀毀如成人及長能
奮勵爲學數奇不成名丁卯從仲氏監司公省曾扈
駕江都補繕工參奉例遷廣興奉事以 穆陵監
董勞陞六品由金吾郎監陽智縣丙子虜猝至公糾
率縣兵令曰後至斬纜入南漢賊已圍城時畿兵多
敗衄而公獨全焉爲政廉清不要聲譽民樹石頌之
無何拜歙谷縣令居數月以親嫌遽尋以訓局郎移
麻田郡守治化如陽智時方伯啓褒之癸未七月廿
五日病卒于官葬楊州車踰嶺負亥之原後以子貴
贈兵曹參判公以早孤爲至痛事母夫人盡孝嘗

寓居畿庄躬織漁箔以供其滋味及喪廬墓終三年
事諸兄愛敬備至二甥窮不自存盡心撫恤教諸子
嚴而有法無少假貸恬淡寡欲視財利若浼婦家無
嗣而饒公一毫無干涉前後典邑歸橐蕭然家無尺
寸長其素性然也其在陽縣也知時象多虞預送衙
眷于湖中未久亂作人服其先見 陵役時蠲除舊
土陳骸多露公捐已財厚衣而瘞之聞者義之俞氏
貫杞溪自勝國聞人相望入我 朝有諱汝霖諱絳
官皆判書諱泳郡守諱大儀宣務郎是公之四世也
妣驪州李氏庶尹承緒之女也公元配綾城具氏無

后繼室龍仁李氏別坐致堯女松坡處士德敏孫幼
受庭訓婦德咸備通達事理御家有則後公廿四年
而歿與公同塋舉五男楷宣教郎樞參判旋節度使
哲監役 贈參判樸僉樞女適李井長長房五男命
虎命元命毅命亮為次房后命尚次房二男四女男
命亮命鳳三房一男一女男命九四房三男二女男
命重早歿命雄命弘皆觀察使五房一男二女男命
凝司諫外孫男益顯女二人孫壻皆士人而多不盡
錄內外曾玄摠數百人嗚呼迹公平生其不及古人
者鮮矣而位不稱德識者恨之逮今後承蕃衍門戶

昌大天之報施其不在於斯歟余嘗以觀察仲季之請銘其先子之墓矣今季公自嶺營馳書來曰吾先祖墓文尚闕方治石垂訖如得子一言是吾兩世泉塗將賴子爲重辭甚懇切余雖不敢當而亦何忍終辭銘曰

孝於家廉於官此其大餘可刪鑿貞珉詔千億匪我諛是實蹟

正郎魚公震陟墓碣銘并序

曩賊臣尹鐫竊弄朝權勢焰熏天一世無不惴惴時則有若魚公伯昇以故舊且有連袂好而絕之若澆

焉遇諸隣家亦嚴辭大斥鐫銜之耿耿不已公不動一髮人難之公諱震陟伯昇其字也生於崇禎四年辛未幼而莊重和厚巖然有器度見者期以遠到十八丁外艱自念早孤失學益慨然悲恫終日對案讀書孜孜不怠至義理肯綮處必覃思力究自得而後已及爲舉子業有名場屋與伯氏正郎公同丁酉司馬遊太學言議斬斬不苟同春宋先生時爲祭酒亟稱詡之屢舉解額而輒屈於公車庚戌持內憂甲寅授司饔參奉丙辰遷典獄奉事時士禍作遂絕意榮進棄歸麻田別墅邈然與世相忘趙公師錫歎曰

伯昇見識人所不及也庚申夏化首除義禁府都事以刑色當鞫獄口應手書職辦事舉長府席者甚器重之五月換授童蒙教官未幾復除金吾郎坐微故罷辛酉春授繕工副奉事以嘉禮都監勞陞付副司果冬拜西部主簿序遷禁府經歷壬戌轉刑曹佐郎以親嫌遞拜戶曹俄出監玄風縣六載居官一心愛民剖決平允糶糴必親吏不得上下其手闔境謳頌丁卯以隣邑推事罷歸戊辰復入金吾遷刑曹正郎己巳春時事大變公憂傷慷慨卽引疾解官杜門斂迹灌蔬蒔花以爲娛絕不與朋儕往還知舊罕見其

面甲戌改紀辟爲訓鍊郎廳乙亥由工曹正郎出爲文化縣令歲值大饑盡心調恤民無捐瘠方伯以謹厚最御史以廉約褒邑俗鹵莽不喜文事尤致意於興學數引生徒親考試以課之儒風賴振及罷歸邑人大憾樹石追思壬午春雩沙李相公復辟爲訓局郎六月十日以疾卒于正寢壽七十二閏七月葬于高陽治西御寢峴坐酉之原公性寬仁平居寡言笑儼然若不可犯而與之語襟懷沖遠辭氣藹然從遊者不覺心醉事母夫人極其婉順常侍左右子職無愆睦宗姻恤窮弱教子弟以法辨臧否甚哲而切不

爲苛絕之事剋核之論安分守拙恬靜寡欲茅簷土
室燕居終日而左右圖書閒曠自適雅善墨梅生活
逼神而不欲以一藝自名常靳於人故世不多傳魚
氏自遠祖化仁肇籍于咸從仍十世簪纓不替入我
朝有曰變甲集賢殿直提學曰孝瞻判中樞府事
諡文孝曰世恭戶曹判書牙城君諡襄肅俱以文學
勲德大鳴於世高祖諱李瑄左參贊牙善君曾祖諱
雲海郡守 贈參判王考諱夢麟童蒙教官 贈承
旨考諱漢明世稱名進士官水運判官以公從勲
贈左參贊妣安東權氏參奉倣之女有婦德公之配

全州李氏僉樞文行之女與公同年月生而先於公
七日廿一歸于公閨儀甚整年五十九卒與公同塋
丈夫子五人長史夏進士次史高甫登第坊 贈注
書次史周今盈德縣令史魯史衛并歿進士二男一
女男有寬有寅女適李夏榮注書五男二女男有龍
文科有夔有成有和有任女適權瑩慎啓東縣令一
男五女男幼女適李思義李璠崔裕興李光遠其一
未行內外曾玄不盡錄余於公有世誼姻好習聞公
風懿今縣令公託以墓文義不敢辭遂摭狀文略敘
如右係之以銘銘曰

否泰迭承兮進退晰衆所翕翕兮如臭惡疇然不滓
兮佩芳潔我撮厥美兮不媿筆

寒水齋先生文集卷之二十六

寒水齋先生文集卷之二十七

墓碣

都正

贈判書黃公

蓋考墓碣銘

并序

德之積於身也厚則福之發於後也大斯不易之理
也考之近世於 贈判書黃公尤可徵也公諱蓋者
字國老昌原人其先事高麗侍中忠俊贊成事河應
大顯於世自是珪組相襲爲東方望族高祖諱湯卿
典籤 贈領議政曾祖諱瑋以藝文奉教忤於時卒
官評事 贈都承旨祖諱立中郡守 贈參判考諱
洞當光海政亂挈家歸鄉絕迹城市俄而遭外艱廬

墓不勝喪 贈左承旨妣 贈淑夫人清州韓氏僉
正應文之女公以 萬曆戊午三月二十八日生年
十一而孤以韓夫人命出為從父 贈參判諱濯之
後以 贈貞夫人光州金氏為妣縣監 贈左議政
諱得中為祖公早受賢母教日夜劬學攻博士業甚
勤及胤子長公曰父子同場屋不可遂自停諸兄強
之竟不聽仍歸洪州庄舍養親飭躬絕意進取晚年
為 順陵齋郎肅謝卽遞旋除麒麟察訪意猶不屑
被二兄之勸黽勉赴官用南尚書二星尉薦直陞掌
樂主簿蓋南公久居湖右稔知公實行而然也又歷

殿中運判以侍從父年七十陞通政授敦寧都正八
十超嘉善陞拜同知中樞府事自都正以後則以老
辭不就已卯仲氏都正公捐館公過疚成疾十月二
十五日考終于洪州之正寢其十二月初九日窆于
本州元堂里參判公兆後負丑之原與夫人同塋異
室後以子貴 贈資憲大夫吏曹判書兼知義禁都
摠管配 贈貞夫人光州金氏學生就兼女生於
萬曆庚申卒於癸卯三月初一日柔嘉淑哲婦道純
備甚為韓夫人所重凡舉七男二女男欽判書鐸佐
郎鎬縣監鍵鍍縣監鈺監役鏞女尹聖璣主簿金斗

璧側出男鎮女郭屏翰權可經判書男受河有文早
歿瑞河縣監啓河修撰柱河志學而歿奎河時爲翰
林女尹世經鐸男在河女崔尚健鎬男宗河女安允
濟側出男來河鍵男泰河教官龜河方爲校理遠河
星河女李瀟北虞候李秀楷進士李燮李濟謙鍍男
遇河達河運河挺河女李燭成濡鄭彥燮鈺男斗河
翼河女崔爾柱進士金時侃林徵大鑄男鵬河起河
女宋造源金時敏金璞根尹聖璣女韓瑞甲李洙牧
使金斗璧男履慶趾慶進士起慶致慶喜慶內外曾
玄百餘人公天資和粹而操履端確允篤於行諳事

親盡其養居喪盡其禮奉先以誠至耄耋祭祀必親
不使子孫攝行待人接物愷悌樂易而是非取舍之
際唯義是從家素貧乏而處之晏如雖一芥之微不
以干人而至聞人窮急必以誠心濟之嘗戒子弟曰
今之以治理名者多尚威猛刑杖或濫字牧之設豈
曾使然凡吏道律身嚴而行政公則吏自警汝其勉
之公之秉心如是故其在西郵也政清人和官有餘
裕及歸郵屬樹石頌之公雅懷恬素薄於世情中間
雖暫屈祿仕終非其志退遂初服以娛晚景時判書
公再按本道專一方而奉之佐郎君亦宰近邑日繼

甘旨其志物之養靡所不至而諸孫之綵服而侍者
常滿前嚮用全福數十年竟以天年終而遺胤後人
餘慶未艾判書公再長天官身參耆社年位俱隆而
謙謹雅飭不以貴顯加人以克追公志其穉孫又能
早通華臚瀛館鳳閣步武相接祿位之盛世無與京
斯豈非德之積也厚而福之發也大者耶嗚呼休哉
銘曰
溫溫恭人德之基於天下事不皺眉簪笏非心偶縻
之歸歟林壑晚節奇篤行于家老不衰神之聽之受
祿空蘭玉盈庭爛金緋凡世為善請觀斯

監役

贈參判俞公哲墓碣銘

并序

自丙丁亂後往往有倜儻奇偉之士放迹湖海之間
不獲世之滋垢以沒其世杞溪俞公乃其一也公諱
哲字汝白少善為文辭飄飄有逸氣詩亦不拘聲律
而意趣自高早棄公車業又不事生產作業晚年卜
築木州之儉溪環堵蕭然不蔽風日而處之晏然凡
世間之榮辱得喪都不關心每徜徉於水石之間嘯
咏忘返有時鳴琴放歌以暢幽情丙寅冬朝廷聞其
名除繕工監役不就以病歿於 崇禎癸酉壽六十
九後以子貴 贈吏曹參判公狀貌魁梧器度峻整

見人有不義若將浼焉而亦不屑屑然與之較早孤
慤初於奉先事諸兄致其愛敬伯氏嘗病篤親自扶
持晝夜不離及喪自殮殯至襄葬無不竭力經紀家
甚貧麤糲不繼而濟人之急若不及焉酒戶甚寬飲
數斗不亂而嘗見有使酒者剛制不近口淡惡黨論
爲一世痼弊閉門自守不與人還往仲氏居宰列所
交遊多名公卿或有願識公者而輒不見焉人有言
時政得失守宰賢否若不聞也至論當世之務疏達
無滯礙先事而論其成敗時有符契者教諸子善於
開發不煩而約及其通顯每以躁進僥倖爲戒少日

當得任子 恩例而恥書名於順治年號之下終不
肯受此可以見公之所存矣俞氏爲東方大姓麗初
有曰義臣以新羅世臣不欲事二君太祖惡之降爲
縣吏其後世有聞人珪組相承六世祖起昌以武科
僉樞得罪燕山謫珍島 中廟改玉擢爲兵曹參議
不仕而終子汝霖孫絳俱爲判書曾祖諱泳郡守祖
諱大儀宣務郎考諱希曾郡守居官有冰蘖聲妣龍
仁李氏祖曰松坡處士德敏考曰別坐致堯公配陽
城李氏正言啓之女從 贈視公爵端莊貞淑婦德
咸宜事姑孝奉君子無違行公每稱其懿範可傳於

世舉三男二女男長命重次命雄觀察使次命弘承
旨女長適金鳳九次適朴垺錫側室三男命立命得
命德觀察使男普基二女壻金應協李範之承旨男
斗基進士次宇基爲長房後次受基三女壻郭鎮基
徐命彥密南正堪餘幼余嘗見士之懷才抱器者其
身不顯則其後必昌今觀察公兄弟颺登華廡進塗
方闢諸孫亦皆蘭茁芝秀其發未艾此皆公之餘慶
也可使世之爲善者勸休哉休哉銘曰
世爭趨羶兮我佩芳優遊林壑兮歲月荒從吾所好
兮無不臧後慶昌熾兮簇圭璋孰種不穫兮報理彰

我銘貞珉兮發幽光

經歷李公_在墓碣銘并序

曩在己巳禍網彌天九菴宋先生以三朝賓師亦
不免於及人莫不矐乎怵焉喪其所守唯傍隨窩李
公能慷慨奮發不懼不挫古語曰劫火洞然不燼唯
玉公實其人乎公諱_在字叔固系出璿源太宗元
子讓寧大君禔卽東方之泰伯公其後也高祖諱元
友縣監贈贊成曾祖諱_穀郡守祖諱光後縣監考
諱性恆仁孝朝名臣官司諫妣黃氏長溪府院
君廷或之孫司諫_奭之女以天啓丁卯正月廿六

日生公幼有異質及長氣度軒豁迥出等夷師事尤
菴先生先生稱之曰此廊廟器也壬辰司馬甲辰爲
章陵齋郎會同僚以事將抵罪公愍其親老而替
當之配沔川世以劉柳故事稱焉庚戌敘拜青巖察
訪辛亥歲大饑公節縮冗費一意賑政所濟活數百
戶壬子移宗簿直長甲寅陞六品時嶺人郭世捷希
兇黨旨疏誣先生甚慘公遇世捷於稠廣中面斥之
賊鑄銜之除典獄主簿公走歸唐津松楸下丁巳移
築海美之前川讀書其中先生取明道詩語以傍隨
揭額庚申夏化除刑曹郎病遽俄以監察出監昌寧

縣三年辭遞直指上其績 特賜表裏邑民立石頌
之甲子又由殿中拜昌平縣令乙丑以善治移全州
判官臺諫以全本文窠爭之 上謂此人素著治績
不許雖卽停論而公終不赴丙寅復以刑郎兼 尊
崇都監郎廳換工曹無何移拜咸興判官翌年邑有
綱常獄罷歸戊辰以宣惠郎 除仁川縣監己巳禍
作公歎曰此豈仕宦時耶遂大歸前川時士類之棄
官者多公實倡焉自是絕意當世迹不復渡漢後爲
漢城判官江華經歷皆不起以癸未復月七日考終
于正寢越明年正月葬于唐津先塋下負壬之原淑

人尹氏蔡氏附焉公孝性出天當司諫公之宰宣川也公方在京忽肉顫心動公驚曰莫是親候不寧耶卽借撥騎倍道馳省則司諫公疾已病矣時有拿命舁至高陽竟不救時黃夫人在唐津水漿不入口十三日而繼歿公扶櫬在途又聞此計一日夜奔三百里至則含斂已畢矣公身兼齋斬如不欲生哭擗踰禮鄉里不忍聞旣葬猶不食菜醬毀瘠成疾殆不能起當其病欲時黃夫人夢勸薑桂則覺輒少愈人皆謂孝感所致公神采嚴毅居官吏不敢仰視而莅民則全務仁惠境內耆老必先存問有婚嫁失時者輒

助其資糶律身清約解官而歸或至屢空而不以爲意然見人窮危思有以濟之車馬衣服共之無難已已之禍有同門友將被謫無所歸要而舍業以免饑寒聞者多之與人交際諧笑歡洽而唯其言論峻正故善者懷之而不善者憚之公與尹拯爲三從兄弟情好甚切及其背師據義斥之又有自稱名流而行若邢恕者嘗遇先生之孫言甚諂佞公大言切責其人慚走又有一士友以非罪陷不測嘗與達官之情厚者相對慨惜及達官自當查啓構誣反甚公薄其人而謝之蓋公疾惡之嚴多類此尹淑人貫坡平其

考獻納璣已卯名賢漆林壽之後閩法俱備宗黨取則年三十六從公守舅姑制不勝喪蔡淑人平康人進士弘俊女亦歿於公喪公三男讓錫司馬參奉次寧錫大錫三女適縣監崔後徵宋宗錫安萬泰季蔡氏所舉也側出男君錫長房男泌活女朴泰觀沈鳳威具尚勲次房男潁汲渠女金恆慶尹滄具廷老李房男濯女金德涵外孫進士錫泰及金益慶李喜慶參軍李衡秀正字李太元林象奎李嵩坤妻崔壻出長源海源真源及成道東趙和壁李冷妻宋壻出怵恪及梁文揆益寧都正梯妻安壻出泌一子東朱鳴

呼公之平生可書者多而最其事親一節實有大過人者况黃夫人死於所天二配亦皆毀滅公之至行可謂有自來而有所化矣若其坎險之會守之甚確陰陽之際辨之甚晰倘非公姿之正而識之明烏能及此記昔先生自巨濟蒙 恩入朝也都人加額廟堂虛席上下莫不勸留而公獨進曰先生在朝能救世道則可不然莫如過還先生曰叔固真愛我也屢歎之不已噫先生常以一直字教人公之此言可謂不負所學矣亦可見師生間相愛之誠也余先祖與府使公有莫逆契嘗欲并舍而居真所謂姓不同兄

弟也以故余視公如切親周旋樽俎情義款密知公之詳世莫我若今參奉君託以墓文何忍辭也追惟往事愴涕而爲之敘如此云銘曰
孝百源義一事猗嗟公能盡此此其大餘推類銘于石筆不媿

察訪

贈掌令閔公泰重墓碣銘并序

余少也出入同春九菴兩先生之門一時同遊者不啻多矣歷數其工夫篤實行該卓絕者必推閔士昂爲第一逮己巳禍作士昂以罪人自居壬申三月十三日遽爾觀化遠近學子莫不慕其德而服其義至

有俎豆之請然知公者不能無餘恨若使公享年久長益懋其遠業則其所成就必不止此此皆士林之公言也公諱泰重士昂其字也生於崇禎庚辰十一月八日幼穎秀端重學語便能知書與羣兒處遊戲不苟屹然若成人焉年十四學于族兄大司憲著重左議政鼎重文貞公維重文藝日進弱冠請業於二宋先生先生期以遠大壬寅中進士遊於壁沼雋望蔚然甲辰監司徐必遠因九菴先生上章對辭絕恃公與諸生爲先生伸暴疏八觸忤天意特命停舉疏頭公走歸鄉里永謝公車一以講廟爲事辛亥

丁外艱衰麻不去身哭泣不絕聲哀毀踰制見者咸服未幾同春棄後學尤菴被竄逐公益無人世念結茅於平沙水石之間扁以樂真以爲終焉計尤菴作記與之自是鼓篋請學者日進公左右提誨隨才應副間亦陳俎豆習禮容暇日徜徉漁社悠然有浴沂之想庚申世道大來朝紳多有薦剡者辛酉除寢郎不起丙寅爲金井郵官又不欲赴被老峯諸長者力勸不得已爲親暫屈例遷直長則公曰非吾素志也遂不拜公操持之力至老不倦其於齊莊嚴肅之工幾於安且成矣臨終更整冠服收斂如平日計聞識

與不識無不痛惜相弔曰此世那得復見斯人耶門人持服者近百數越一月丙辰窆于鄉之銀城里己卯臘月用術家言遷奉于陶村負坎原後觀察使宋相琦以公孝行學問聞於朝命贈司憲府掌令公容儀嶷然風采灑落人一見輒敬慕而亦莫不畏憚焉天姿近道又孺染於大賢之門妙年發軔門路正大雖疾病沉苦不克刻意攢程而其見解之明透踐履之真實實有儕流之難及者雖嘗淵默而如遇邪正義理之分辨析嚴正如一刀兩段以禮飭躬尤謹於四禮推以及人瞻聆化之孝德出天少讀小學得

庚黔婁稽顙北辰語惕然興感每夜默禱親壽終身
不怠而妻孥不知也非有事故須臾不離側扶持抑
搔不使少者代之和婉順適始終如一時作老萊戲
務以娛意家素貧親厨必極滋味佳辰壽節別具酒
食必問所欲與而盡分之慤勑於奉祭前期必散致
哀痛如袒括時晨謁朔參必遵禮式非疾甚未嘗或
停也宗姪貧窶無以供菜盛則公必躬備使無憾焉
先山象設公悉經紀於外氏亦然先府君墓松公所
手植雖經近年蟲災蒼鬱如舊見者奇之以爲孝感
伯氏早世外不形悲痛色以寬親心而退省其私淚

痕滿枕孀妹遠居歲必一致極其湛樂撫愛諸姪不
間已出家庭雍穆和氣藹然叔父家窮困公爲送婦
家所得臧獲以資之庶姑無所歸一生養於家推以
至於疎族愛博而情遍鄉隣觀感咸一口言曰盛德
君子至其待人接物誠意款洽然見其不是則未嘗
少饒蓋其寬和醇厚之中帶得壁立氣像如此居官
清簡仁恕吏卒咸戴如父母至今不忘蓋公平生絕
俗之行濟物之仁皆可書而不能盡書也閔氏系出
驪興以麗朝尚衣奉御稱道爲鼻祖自是世出間人
爲三韓大族八我朝有曰齊仁號立巖官左贊成

乙巳士禍之作也建言安名世史筆不可改坐是謫
卒寔公之五代祖也高祖諱思容文川郡守曾祖諱
汝任號振衣官參判選清白吏後 贈左贊成祖諱
杓社稷令考諱光赫黃澗縣監妣慶州金氏桑村先
生自粹之後其考曰豈也配李氏全義大姓秉節校
尉復先之女婦德甚備別有狀文不幸無子女以伯
兄致重之仲子鎮喬為後鎮喬娶縣令崔斗瑞之女
生四男二女男曰景洙宅洙志洙游洙女適郭來復
朴胤興嗚呼記昔春堂先生嘗稱公曰士昂他日將
必為士林師表目今滄桑百變士趨日汙而世無大

人君子坐鎮頽俗倘使公猶在者吾道之孤豈至於
斯耶嗟呼何處得來顧余鄙鈍窳啓百不猶人而公
嘗許余以知己余亦自以為知公今景洙持閔台靜
能之狀泣乞墓銘余何忍銘亦何忍不銘遂投涕而
撰次如右銘曰

於乎其質孤松老栢於乎其志清霜皎日紛有內美
從事聖學篤信師說潛思實得世路難行婆娑林壑
白雲為友黃卷為樂天閑其年志業未卒吾道其衰
士林懷憾有宰其丘有屹其石有來千秋過者必式

都正 贈參判趙公 泰來墓碣銘 并序

公諱泰來字伯休漢陽之趙以高麗判中樞院事岑
爲上祖至文剛公末生事我世宗官兵曹判書大
提學自是簪組代承曾祖諱存性知敦寧諡昭敏祖
諱啓遠判書諡忠靖兩世俱贈領議政考諱禧錫
郡守贈左贊成妣水原白氏休菴公仁傑之玄孫
郡守弘一女也公以崇禎庚辰正月初七日生幼
受學於忠靖公屢舉不中既孤不復就公車庚申筮
仕拜繕工監役冬以魂殿都監監董勞陞掌苑別
提自此所歷內則掌樂主簿平市令儀賓都事引儀
兼參軍五衛曹司將中樞僉知敦寧都正外則龍仁

縣令陝川郡守茂朱府使原州牧使其不赴者平壤
庶尹公州牧使也以乙酉十月廿六日考終于第葬
于木川納安里負坎原後以子貴贈吏曹參判兼
金吾摠府公早違嚴顏奉慈氏竭其誠與弟妹友教
諸子甚嚴坐起言動不命不敢至於急人之困如恐
不及見人過失不能容雖於稠廣之中無所饒以故
與世多抹掇若其治邑則嚴束姦強竭心修舉所在
衆瘼悉祛府庫充羨治行輒居人先其陞通政實以
陝邑時褒典而已已參吳忠貞公斗寅疏爲姦黨所
嫉中之以微文至於論配人皆嗟惜蓋公爲政雪霜

過於雨露以致謗訕先行不克展布其才具可慨也
已公配海平尹氏參贊塔女恭和柔順婦道咸宜贊
成公嘗曰豈有德如吾婦而不福者乎生與公同年
歿先公八年與公同塋從 贈視公爵二子行彬副
率道彬監司副率一女適申思迪庶男榮茂監司男
榮普榮會榮魯榮曾為長房後女適宋徵履余先子
與贊成公交誼甚篤故余與公亦世講不替今監司
公之託以墓文有以也遂為之銘銘曰
赫赫華胄恢恢利器一心官政事修謗起何才之富
何世之隘黃巴一疏銘筆不媿

郡守朴公 泰斗墓碣銘 并序

當乙卯之歲羣兇柄國假禮論構禍以尤齋宋先生
為貶薄 孝廟旣梃棘于荒裔又必欲加之極典而
後已於是朴公泰斗率章甫數百人伏 闕訟寃并
指斥姦兇之情狀言甚痛切時火色方急禍在呼吸
有敢出一言救先生者輒被竄殛桁楊之律士氣摧
沮莫不瞠乎怵焉公獨不懼毅然首多士促裝以疾
行遣疏入 上不之深罪只命停舉公之為此舉蓋
決一死以救斯文之禍而事止於是非始慮之所及
也庚申變化筮仕為四山監役充錄勳都監監造官

用其勞陞六品階爲司僕主簿壬戌出監秦仁縣以
微事見遞敘復掌樂主簿甲子 明聖大妃昇遐爲
都監郎遷軍資判官旋除文化縣令俄以治績異等
陞溫陽郡守丁卯病遞家居六七年杜門養疾甲戌
爲高陽郡守又以病棄官居數月終于正寢是丙子
正月廿一日戊寅也得年六十以其年三月十六日
葬于安山郡西負亥之原從先兆也公字希文又字
伯瞻神采精明氣度英毅遇事立斷凜然有不可犯
者而卒亦反之以仁恕好善疾惡憂時慷慨發於素
性乙卯之禍李公世弼先被謫公送之郊酌酒與別

曰子行矣吾當繼子而起嶺海之外行且共之於是
士論壯之遂以疏首歸之公尤篤於內行事父母盡
其愛敬侍疾夜必露禱北辰前後居喪皆以戚聞旣
練食菜果奉先追遠誠禮兩至時節饗祀升降跪拜
秩然有序復於位則必植立不少動下逮婢僕亦肅
然無聲每日晨起謁廟非疾病未嘗廢與姊妹諸弟
友愛淡摯季弟夙嬰奇疾公委曲撫養如慈母之於
穉子六弟有才早塲公痛之甚營宅以居孤寡嫁其
二女如已出庶曾祖母高至老無恙公日往省不懈
其子澹賢而文公悶其窮與之同室及其病親執藥

餽歿而衣衾棺窆之費一皆取辦於公其孤無所歸
又結屋而卑之推以及於宗族一以誠悃其在尊行
雖年齒相近而或下焉者必下庭迎送唯謹聞其喪
輒屢日食素以爲常不問服之有無性又儉素服御
器皿無一玩好見者莫知其爲綺紈子弟也居官聽
斷嚴明恩信周浹賑飢備盜皆有方略然淡以矜術
沽譽爲恥故所至雖無赫赫聲旣去輒見思少嘗有
意於爲己之學從叔父玄石公喜而淡贊之雖喪威
疾故未遂其志夷考其平生則居家莅官不合於道
理者寡矣嘗曰學非必高談性命孝於親友於兄弟

臨事不敢爲非只此是學蓋先行之言也公羅州人
潘南先生文正公尚衷之後治川先生文康公紹之
五世孫曾祖諱東亮判府事錦溪君 宣廟朝名臣
祖諱彌錦陽君尚貞安翁主文章節行爲世推仰考
諱世橋掌樂院僉正 贈左承旨妣全義李氏正郎
碩基之女清江公濟臣之曾孫公先娶豐壤趙氏進
士來陽之女卽浦渚文孝公之孫有女士稱玄石撰
誌葬祔公左一男弼夏參奉三女李明晉俞復基進
士尹澤府使後娶寧越辛氏縣監暉之女大司憲慶
晉之曾孫別有狀葬在公墓之右麓一男弼周薦拜

侍講院諮議一女俞學基參奉弼夏男師益修撰師
高師聖翰林師衡女尹湜李世臣尹得文李明晉所
後子夏濟俞復基女李倚相尹澤男得恆得謙得晉
女李顯輔金元謙俞學基男彥鏡彥鏞女幼嗚呼錦
陽公以高文碩望冒於禁近不得展其抱負之萬
一是若有遺羸以待後人者而僉正公既不食報公
又懷瑾握瑜其文辭足以取科第其言議足以備諫
諍其才猷器識足以策立事功而卒亦阨於甲乙淹
回下位而壽又不遐豈非命歟然諮議君以學行鳴
世修撰兄弟又相繼通籍為士類所重天之報施其

不在斯歟余未獲從公遊竊因士友間聞其風而愛
慕之今修撰來乞墓銘何敢以不文辭銘曰
斯文陽九禍焰罔極公批領鱗姦壬褫魄滄桑百變
公守彌堅彼反復者寧不汗顏後凋唯松不燼者玉
美且脩能進塗空闕位不稱德士林永傷餘慶方來
繡黻煌煌

廣興守尹公明運墓碣銘并序

我同門友有尹公汝會蓋觀其平居粥粥若無能常
有退人一步低人一頭底意象而及其遇患難其剛
鐵石當己已禍作外舅李公慶昌謂公曰目前之禍

機方煽何可自蹈公笑曰義不可免則禍不足恤李
公歎其有守不復言若是者當於古人中求非衰世
人豈非有得於我師門正直規模者耶公諱明運汝
會其字也坡平之尹以高麗太師莘達爲上祖而有
侍中瓘以德業致大名後九世世有大官入我朝
坡平君坤官崇政冢宰高祖諱仁涵號竹齋官參判
曾祖諱弘立典籍 贈都承旨祖諱惟健進士 贈
參判值光海昏朝篤學不仕考諱飛卿官參判先是
善道構禍斯文公居言地以誣人以逆當施反坐律
力爭之世以直言稱妣李氏佐郎九淵女牧隱之後

聰敏強記略通經史辨論古今得失鮮不中理公生
於 崇禎壬午卒於戊戌月日得年七十七公與伯
氏眞寶公明遇受業於九齋宋先生儕友咸推與焉
肅宗大王初卽位先生以禮論爲鑄黨所構誣禍
將不測門人宋尚敏進論禮冊子大忤羣兇竟死柩
揚暴屍金吾門三日公實與聞冊子事不忍其無人
收屍與尹公以健匿屍於山谷間以殮瘞之人皆義
之時尹拯惑志於鑄讎視師門及其徒稍貳於先生
則乃敢乘機闖發誣先生無忌憚公與拯爲近宗且
有世好惡其背師無狀絕其舊好同韓公聖輔上辨

疏痛斥之已巳時事大變 聖母遷私第兩賢黜聖
庶兇徒之構罪先生日益急公歎曰此豈仕宦時耶
亟申狀不仕卽與同門人疏暴師誣 上怒益深先
生竟被後命遂同諸生伏 闕號泣盖用己卯故事
也乃以素帶加麻服先生吏曹承 上命書啓不仕
諸人 上特下備忘曰曾前不仕之類雖不可一一
追論而至於某則不仕翌日旋參於李箕疇之疏其
不仕之顯顯有意可知輕蔑朝廷之罪不可不從重
科斷以爲懲一勵百之地拿問是時希載之母舅尹
姓者起於賈堅與公爲官一署公之不仕盖亦鄙其

作僚彼輩以此銜怒至是遽有此事知舊莫不危之
及勘謫賊黠時判金吾嚇之曰 上怒方深不可以
畿邑配李公垓叔固先已棄官歸海美鄉廬移書公
曰於我乎館朋友義也公遂以海謫焉託李公眠食
與李公相對慨傷時事唯寄意杯酌自世禍之後士
友多落南湖海之間偃一水南北矣與數四會意者
興至覓酒相呼喚入伽椰上丹丘或徜徉數日悠然
若將終身焉甲戌四月 上悔前之爲克返 坤位
追復宋先生官爵是月用筵臣言首敘公爲 宣陵
參奉公登庚申別薦甲子筮仕在參下凡三罷官而

四除職由奉事直長己卯始陞內資主簿自此所歷
禁府都事新寧縣監掌隸院司議江華經歷掌苑別
提尚衣僉正廣興守司宰僉正其爲新寧也新經大
饑疫蕭然如兵燹後公至曰如人大病纔去唯安養
可蘇爲政主簡靜無擾又曰民固赤子而吏亦人也
唯威明以莅之不至害民而已虐之則不可又曰世
之蠲正賦以干譽者固不可若爲民怨之甚者亦不
可無變縣自大饑後糶穀之逋欠殊多不忍徵及隣
族捐俸累百石補欠而取案火之歲時具米肉賜境
之老人春和設宴以禮之訪家貧無以嫁娶者助資

俾不失時學子與武士各以所業程督月終課其最
賞之以爲勸縣東數區旱鹵廢耕爲築池使民食其
利邑需舊例靠官吏貿直不及其半公以爲爲官而
脅徵於吏吏不取之民將何出乃悉心規度設廳需
用罷勒貿之規及歸民無老少爭道遠將曰賢太守
去矣莫不咨嗟涕泣遂立生祠以生朝用薦牛酒適
有朝禁夏勒大石以思之公稟性和粹宅心安靜規
模簡素勤慎對人寡言語臨事少計較絕無虛誇浮
浪之習忿厲殘暴之容操行不至刻苦而惰慢不設
於燕安之時諧謔不及於到爾之友家事屢空而口

不出求乞之言仕路甚踰而心不萌怨尤之意其應
物莅官人初或不以為奇而久則未嘗不誠心悅服
嘗有人之官於公之隣治其父戒之曰汝每事就議
於尹某則自可寡過其平日見服於人此亦可見矣
與季氏及宗姪終世同居寒溫飢飽憂戚欣樂少無
物我之分隆洽之樂至老彌篤人不得間焉是以和
愉之德浹於一室以至妯娌相愛慕如同產僮僕相
和樂如親戚無詈訟之風爭析之言蓋其推之身而
行之家者如此公嘗以為吾年至而不能止尚此潦
倒於僚底者只為貧資斗米耳白首從仕豈素志哉

及鳳九為養得一縣則公喜發於色曰吾可休矣居
數日而卒其平日雅意可知矣初娶全州李氏廣平
大君之後持平時馥之女舉一男鳳輝進士直長繼
娶和順崔氏左尹遠之曾孫學生爾獻之女舉二男
鳳威鳳夔三娶完山李氏 恭靖大王之後其考即
李公慶昌也舉二男一女鳳九縣監鳳五進士申暉
其壻也鳳輝側出二男心海心浩鳳威三男心雄進
士心準一幼鳳夔一男心泳二女幼鳳九一男鳳五
一男二女申暉一女皆幼心雄二男亦幼鳳夔不勝
喪後公八月而亾公之葬在交河治東支石村坐丁

之原二淑人葬於坡州泉峴鳴鶴山東負西之原嗚呼利義禍福之際雖世之自好者及到手頭恒撓失措殆不能自立避哉我汝會死生在呼吸略不動心真所謂疾風之勁草也時清之後依舊退遜終於下僚安其淡泊斯又難矣况其中間起廢實與老先生同其伸屈則亦足以定其平生後之傳黨錮者必有以公序之矣若內行之純篤居官之廉謹自來家法然也噫公之諸胤士望蔚然而縣監君學識明透儕流之期待遠大公之未食之報天將大發於斯耶當拭目而俟之銘曰

猗夫夫如崑玉劫火燒不渝色泊黃巴世禍酷衆瑟縮公奮作鼓同志櫻頷尺事罔極守闕哭鎖圓扉竄海曲斯文變宗門出不少饒如距斂士服義咸吐舌此其大餘可識故人銘筆不作

郡守李公遇輝墓碣銘并序

余與聽溪李公有連袂好又嘗接武於二宋先生之門情義淡摯常有歲寒之期今公之墓木已拱撫念疇昔涕不勝技公之胤縣監淡以碣文託余余雖老病將死何忍辭也謹按公系出璿源世宗別子廣平大君於公九代也高祖諱仁健縣監贈贊成曾

祖諱郁郡守 贈議政祖諱厚載僉樞 贈判書皇
考諱迴司憲府掌令 贈贊成以清直顯於 仁
孝朝前後配有七子公其季也妣慶州李氏縣令肇
廈女以 崇禎戊子七月八日生公諱遇輝字君晦
幼有至性八歲而孤服喪致哀如成人學于伯仲氏
文理驟進及長遊師門受性理諸書尤用工於小學
家禮問難精密先生稱其篤實士友亦多推許早廢
公車業築室於廣州先壠下扁以聽溪然大夫人在
京不敢鄉居時時往來棲息已巳禍作尤不樂於京
輦常懷遯世之意甲戌夏化被經明行修薦丙子以

司圃別檢換金吾郎移童蒙教官戊寅陞主司僕長
興簿轉禁府經歷己卯出為新溪縣令冬丁內艱壬
午歷司瞻主簿社稷令為右水運判官甲申除南平
縣監未赴遞還運判遷漢城判官乙酉陞庶尹為淳
昌郡守時有濫率之禁自劾而歸居郡一年治化大
著丁亥元月廿七日考終于家四月十三日葬于先
山外麓率禮洞壬坐之原公之配尹氏坡平望族其
考府使鴻舉溫恕端淑事尊姑以孝奉君子無違治
家有法度親黨誦其賢凡舉四男一女男長卽漢次
漸沉淹女適沈廷敘側室男泳次幼漢二男一女男

顯謙顯觀女適申達洙漸四男二女男顯恆顯升女
適金聖徵餘幼沉一女適趙正臣公剛確凝重天資
既厚而依歸大賢得於觀感者多矣平居粥粥若無
能而卓然有人不可及者事親有至誠淡愛先意順
旨靡不用極而遊必有方返必趁期嘗在廣村忽夢
大夫人違和驚覺急省則果然疾欲人以為誠孝所
感伯氏與宗姪專城榮養則輒往侍不離側返第則
公自辦滫瀡極其滋味而必有餘閤事不專行財無
私蓄如有不安節憂形於色衣不解帶疾革晝夜扶
將血指和藥及喪擗踊如嬰兒時公年踰五十而不

脫縗經不食蔬菜終三年只啜水澆飯脚痛不能起
行而晨昏上食自力必參常伏靈几前淚漬席腐朔
望必出往拜墓而逮居山廬則逐日不拘風雨外除
之後茹痛不已常以早孤為至痛先考忌日終其月
不肉斯可謂終身之慕也歟公以長房奉高祖祧主
晨謁享嘗一從家禮參酌情文著二禮精要為家間
遵行之規事係內外祖先悉心經紀靡有餘憾篤信
師門血誠服勤方已已禍迫與同門人相議備送終
諸具星夜馳赴盡誠治喪服加麻五月居處飲食一
從禮訓諱日必設位而哭在官則備送祭需摹真像

奉于家以寓瞻依之誠師門有事必爲之倡接人以誠樂善不倦見有向學之人諄諄提掖俾有成就立心持已絕不苟且矯飾少時頗有疾言遽色而自知有害於心性痛加隳枯不妄喜怒晨興端坐終日書冊几案井井方方衣不紬帛食不重味尤嚴於內外之別出入必相拜閨門之內肅然禮敬可觀正朝則淡衣幅巾出坐正堂使子孫男女序立再拜奴僕亦如之睦姻宗族周恤孤窮吉凶貧不能自辦者必濟之俱得其歡心謹於辭受雖知舊之饋無名則卻之諸姪多居顯要或有因緣干囑者必嚴辭斥退婚媾

避貴勢家曰溫公之論龍門之戒實萬世之至言也其莅任也廉平持大體節用愛民以故雖無赫赫聲吏良民懷輒有去後思及其解歸行李蕭然不以一芥自累罷官家居杜門却掃權要之門雖平生親交絕不往還疾病未嘗廢盥櫛至屬纊之日命進梳具理髮如常神氣恬然無怛化色蓋其所守此可見矣嗚呼聖人於文質先後不啻重言複言而世衰道微夸毗衒耀者得意尊顯忠實愿慤者反居其下豈不可慨也公以大家良子弟實行如彼而終於令長此雖公之素志世道之不古可知然闇然日章亦君子

之所貴若令知德者評之何可以一時顯晦定其等
品哉今余自謂知公僭論至此如使九原有知公必
莞爾而笑也銘曰

於惟聽溪韞潛德保赤子心濟以學孝悌孔空動可
則大連居喪風教立乍蒞桐鄉遺黎泣安吾澹泊返
冥漠孝子翼翼樹穹石令名長流過者式

郡守趙公楷墓碣銘

并序

損菴趙學士根與其弟楷君範受學于允菴老先生
先生甚愛重之余猥與之同門情義深切今泰山已
頽二公亦作古人撫念疇昔悲不自勝乃者君範之

胤觀察使榮福樹碣其考之墓謁銘於余余雖老病
將死何忍辭也記昔 顯廟甲辰之歲承旨徐必遠
因事上章曰祖與父有輕重父讎可復而祖讎不必
復時議多從之 上入其說先生聞而愕然曰關係
倫彝不可不論遂上疏明其不然引禮經復讎盡五
世之文及朱子說洞辨之必遠又上疏自是反詆先
生一時譁然甲乙互爭時君範以諸生倡多士斥必
遠辭極嚴峻 上命還給其疏政院請 批下於是
乃答然以此 上意激惱臺臣相繼得罪太學屢自
空齋波瀾漸濶是非顛倒而正論自公始直聲振一

世辛酉用薦爲 恭陵齋郎 陵所與親庭十里而
近公往省卽還適值禮郎摘姦告以闕直公就理以
實對 上特原之命帶職放送癸亥拜慶安察訪轉
禮賓直長陞通禮院引儀遷主長興庫簿戊辰出爲
洪川縣監己巳禍作坐先生門下臺諫劾罷之甲戌
夏化由掌樂主簿金吾郎爲金溝縣令道臣以善賑
褒啓有準職 承傳丁丑移淳昌郡守居三年邁疾
歿于官己卯七月二日也壽六十一公生未踰月慈
氏見背被育於祖母許夫人嘗以早失所恃爲至痛
見隣兒無母者輒曰彼我情事無異特加矜憐事家

大人至孝服勤四十年如一日大人居喪廬墓公與
一老僕侍至於具餐治蔬莫不躬執己未親濟濱危
半年不解帶露立禱天冀以身代果得神效人謂孝
感庚午湯憂又欲沉綿八閱月遺便尿日數十每易
褥薦公必自爲時公亦衰病而不令子弟替行及喪
過毀幾不能全嘗以宗孫貧不能祭自備饋奠以終
三年事損菴公悌愛篤摯兒時同患疹疫公每攢禱
曰雖殺我必生我兄損菴平居或訶責公公必和顏
以受損菴旣歿孤姪繼亾事亾嫂甚謹撫兩穉孫使
得成長庶妹未字厚糴奩以嫁庶弟貧寒盡償其積

債當析著厚讓而薄取之隣人有闔家飢餒者分所
食以濟俾免於死人皆義之臨民專尚仁慈金溝時
值乙丙大無視老少饒乏而賑之緩急多寡皆有條
理麥秋又歉則料理備穀近千斛濟活贍足流丐亦
計程齎糧俾還本土往往有願畱者畱意學政擇士
之有才者分處校院資糧勸課文風頓進遞去之日
攀轅泣別立石以思若淳昌則豪族恣行不法勢傾
一境吏頑難制姦猾成習公用重典治之至聞於朝
以抵罪公雖視民如傷其威東姦強亦如此趙氏貫
咸安以新羅大將軍鼎為上祖入 本朝贈參判旅

事行與金東峰同號漁溪寔公之八代祖也高祖諱
堪在白休菴甥館與牛溪同受業為道義交官宗簿
主簿 贈執義曾祖諱毅道軍資主簿祖諱鎰平市
令兩世俱 贈參判市令生同知中樞府事諱逢源
以高風峻望見重一世是公之考也妣草溪鄭氏判
官時懌女 贈貞夫人公之配晉陽姜氏其考參奉
游性聰穎於古人嘉言善行靡不通曉損菴稱以女
學士父母偕歿只有一弟甫六歲家故饒秋毫無所
私生於壬午後公一年而卒與公同塋其原負西其
地陽智鳳臨山公有四男俱司馬長即觀察次榮祿

郡守次榮禔次榮祐參奉女適士人李德涵孫男重
行其二幼女進士洪銓輔一幼長房出也次房二女
幼三房早世無嗣季房二男二女幼外孫男星老生
買山老進士參奉嗚呼以公之人地才猷又濡染於
大賢之門行誼篤至聲望藹蔚空若大振厥聲以展
所學而棲遑郡紱齋志沒世豈非命也然觀察君進
塗方闢天將以是伸公之屈耶銘曰
百行之純源孝德依歸大師觀正直青虬叫 閤異
言闢士爭誦義光竹帛孝子翼翼豎穹碣故人銘之
不媿筆

郡守李公社遐墓碣銘 并序

曩賊臣爾瞻始有人望欲爲固寵計嗾其黨斥已故
作退去狀四學墮其術將陳章勉畱南學掌議李公
社遐獨抗言于座曰瞻我宗人我習知之此舉真小
人情態何不覺悟也仍慷慨激昂一座無不愕然亟
施重罰公綽綽徐步而出時年十七姑夫韓正言瑄
握手撫背而歎曰此兒乃能辨此耶死生在天今之
可言者奚止此也公欲上疏極論爲家大人力止遂
走歸嶺南聞者吐舌公字子綏廣陵人始祖曰集仕
麗官判典校事有剛直聲斥辛晫見忤負其父逃禍

世稱道村先生曰之直事我 太宗芳碩之亂叩馬
而諫左右欲兵之 太宗命釋之曰仁孫 世宗朝
右議政諡忠僖三世仍大顯於世高祖諱秀萱上護
軍曾祖諱潤德同知敦寧府事祖諱汝良寺正考諱
孝訥縣令聘清州韓氏以 萬曆辛丑正月二十六
日生公仲父府使公諱孝訓取而子之妣南陽洪氏
其考學生胤祖公少遊任陳菴叔英之門文藝夙成
十五發解一等戊午丁內艱癸酉中司馬諸大臣以
掌議時事白于 上超拜司饗院奉事屢遷司憲府
監察義禁府都事癸未出監眞寶縣民樹石頌之後

歷三和陰城青陽安城等邑丁未拜永平以老辭歸
寓忠州永竹庄舍辛酉考終壽八十一葬于家後丑
向之原公前配延安金氏察訪埒女生二男相殷相
周五女適都爾稷李榮漢進士成世童尹諫李光受
後配清州韓氏震女生三男相益相稷生員相成文
科持平三女適朴井東元藻任瑞龜進士相殷男光
九光行光範光老女宋奎燦沈進道尹泌相周男光
緯光白光朝光弼都爾稷男萬華萬里進士李榮漢
無后成世童男鳳章進士尹諫男泰來女鄭震奭李
光受男重輔道輔弘輔生員女洪以溥進士相益男

光春光輔武科光天女金鼎瑞武科魚有瑗相稷男
光國女姜柱極相成男光運文科光進生員光通女
宋澄源朴井東男淡女鄭震百元濛男弘迪女魚史
龜朴省任瑞龜男應度女成鎮南吳命哲閔天孝公
謙冲樂易事所後母盡子道與弟妹湛樂居官簿書
甚明剖決如流莅真時按使洪公歲極稱之曰以某
之才沉於下僚當路者之責也解官歸家礮石屢空
人服其廉公之言行可書者必多而伯仲子早亾餘
皆晚出家乘又失於火不能錄記其什一無以考信
於來後惜哉嗚呼以公之氣節才華終乖一第進塗

不以文棲遲於郡紱之間倘所謂命也耶然今持平
君歷敷臺閣其進未已有屈必伸天道可徵當拭目
而俟之銘曰

始姦賊瞞一世公早辨如見肺辭而闢凜秋霜衆皆
愕我自揚孰如明亦何確觀乎此餘可識

直長宋公墓學墓碣銘并序

宋氏蔚然爲東方法家公 贈領議政睡翁公諱甲
祚之嫡孫珍山郡守諱時默之子允齋文正先生之
從子諱基學字君悅生於 崇禎辛未七月十九日
自幼智慮超羣三歲火燃所穿衣能自沉水以滅之

人異之髻鬢已有儀度不隨羣兒嬉戲常沉默竟晷
家大人以其類已甚愛重之稍長學於允齋先生已
知修己治人之方嘗治公車業屢占解額而不中則
曰命也年未四十遂廢舉業文谷金相公秉銓薦拜
內侍教官未數月以嚴親疾患棄歸日夜憂遑逾年
不解帶及喪哀毀幾滅性壬戌拜司圃別檢束吏甚
嚴卒以此見罷癸亥為省峴道察訪蘇殘去瘼割俸
賑饑驛卒追思立石頌惠陞拜尚衣院直長病不赴
居數年值己巳禍允齋受後命睡翁亦被誣辱公
無意於世杜門養親志物俱盡大夫人甚安之辛未

丁內艱時公年過六十執禮愈謹而亦無疾病蓋其
定力所及也辛卯以大耄陞通政副護軍壬辰寢疾
自知不起而泰然無怛化色以九月二十日終于外
寢臘月二十一日葬于公州儒城縣寶文山負嶺之
原實前配尹氏舊兆也尹氏籍坡平考參判飛卿妣
韓山李氏乙巳參判公居憂火起母殯李氏冒烈焰
救柩灼爛而死尹氏在遠聞變水漿不入口以正月
二十七日繼歿年三十三聞者悲之允齋先生挽李
夫人詩謂吾家低面襲餘馥蓋歎烈孝有自而能為
是母之女也後配朴氏潘南大族通德郎楷之女事

尊章承夫子以誠不以文撫愛前配子女一如己出
宗黨稱其婦德戊子十月二十三日逝年六十八初
葬報恩治西老台山及公之葬遷而附焉公有三男
二女長宗錫縣監女適正郎辛相東次適監役朴欽
尹氏出也男舜錫禹錫朴氏出也側室男多錫齊錫
輔錫女李潤華李瑞海縣監男長源海源眞源斗源
女成道東縣監趙和璧縣監李冷舜錫男光源徽源
理源女金櫨餘未行禹錫男建源寧源女進士李廷
煜辛壻男光復弘復女下東龜朴壻男興漢隆漢女
李普一內外曾玄不盡錄恩津之宋以高麗判院事

大原爲上祖世德詳載珍山公碣文此不著公莊重
仁厚望之知其爲長德君子口不言人臧否傍人有
諧謔若無聞也論議主於和平以故賢愚貴賤莫不
敬慕曰必早起盥櫛手不釋卷無故不妄動尚儉素
麻衣草坐以終老截名分以畜妾媵閨門之內肅如
也奉先之禮一遵先矩罔敢或替嘗痛外王考奉事
李公著生之無嗣也擇於族人而立後以奉其祀祠
墓諸事竭力檢理又營阡表而豎之最嗜經籍至老
不懈有受業者誦而教之嘗曰聖賢書非不多矣其
切於人者莫如小學於此服膺則庶乎有得也邑中

後生有學於允齋先生者先生曰家姪頗精於經書
吾亦不能過也爾何必遠來也以此來學者多及公
之喪經而出者十餘人先生嘗曰某也文學不在人
下而渠自韜晦故人無知者可恨也自少不喜交遊
己已後不出門外又未嘗接客穆然靜坐人不窺涯
涘慎於辭受一芥不妄取人有貧不能婚葬者隨力
顧助使不失時或有凍餒而濱死者必周之賴而全
活者多鄉中有節孝人公作詩以褒之又勸多士呈
官狀 聞至蒙恩典家素饒未嘗營利末年生業旁
落而晏如也三躋仕路而足不及權要門名位不遂

而亦無悔其拜司圃也文谷責銓長曰此人豈可處
此職非待士之道也李公選曰生今世而古人心者
獨於宋某見之其見重於當世者類此余嘗出入於
師門稔知公德而家子久宰三山每服公居鄉之
善吃吃不已噫如公者當於古人中求非衰世人也
嗟乎何處得來每念之悲辛今縣監君乞墓文余雖
老病將死何忍辭也遂撮大略而敘之係之以銘曰
澹若古井溫如良玉富有其學制行純篤迹遠要路
安我沖泊此雖公志世道可惜遇艱含貞晚節允卓
寶文之麓宰如玄宅我辭無媿令名千億

司議吳公斗成墓碣銘并序

公諱斗成字德裕知中樞府事諱翺之子子天坡公
翺之從子也生於壬午九月十日早事公車業屢魁
泮製命奇不偶庚申為孝陵參奉用都監勞陞六
品拜金吾郎從氏忠貞公斗寅為堂上以嫌遞歷瓦
署別提軍資主簿為司憲府監察故事有聲望者為
上有司諸僚咸讓於公公守三尺不撓胥吏懼伏除
石城縣監以親老呈遞復由殿中出監陰竹縣甫數
月以道伯親嫌遞民樹石頌之復入金吾拜積城縣
監時旱蝗傷稼公虔禱果大雨漂蝗闔境稱異衙舍

客館傾塌難支經紀未久一復其舊尤明於訟獄上
司舉道內難斷者悉昇之有豪民縛五六人以訴曰
夜強盜入民家與里人捕納公一見知其非盜詰之
民果輸款其發姦類此乙丑遭外艱丁卯憂吉己巳
參忠貞公疏坐錮後以金吾郎為漣川興學校修武
備比周歲一變又以方伯親嫌遞為金吾郎丙子陞
掌隸院司議屏關節制猾吏官長嘖嘖尋為抱川縣
監縣當東北孔道冠蓋絡屬公至則設保民廳不令
民出毫毛民到于今賴之戊寅春饑甚料理屢百斛
穀以賑之民無流逋再經西路站役而皆自官辦一

不擾民直指上其事褒之土豪之武斷者重法繩之
豪乃造訕陰中公遂投狀辭歸按使窮覈無實促公
還任而終不應壬午爲翊衛司翊贊甲申持平趙泰
億偏信土豪之言劾公甚緊至有秋曹再查之舉拷
吏隸甚酷而公之誣竟歸虛公自此斷世念謝官歸
陽城之先壠下日與親懿衍衍相樂忽以微恙逝寔
戊子正月十一日也公事親竭其誠知樞公疾革割
指進血大夫人病中思西果背節未得進公痛甚終
身不食西果前後居喪哀盡禮備家本貧乏而墓前
儀物悉辦於三年內宗家大小祀必具饌以助之姊

氏喪於瀉手自殯斂撫愛孀姪甚篤推而至於黨族
朋舊無不各自致其款曲然見人過失不少容貸遇
事直遂未嘗爲氣勢所奪故人以是多之而亦不免
於困滯惜也海州之吳以高麗軍器檢校仁裕爲上
祖其後札尚書左僕射至本朝世襲簪纓有諱定
邦武科大將當光海廢母之議立異坐廢是生典簿
贈贊成士謙卽知樞公考也妣貞夫人海州鄭氏
海豐君孝俊女公配淑人咸平李氏觀察使九畹公
諱春元之孫敦寧都正 贈戶曹判書諱楚老之女
在家孝友之行出人及歸善事尊章一無違志知樞

公晚年養於公每讚淑人之賢曰吾當終老於此婦
愛敬承奉三十年如一日及喪哀過而事辦自斂殯
葬祭皆出淑人之經理而無所憾焉通古今達事理
尚儉約喜施與訓子女睦親姻百行俱全真古人所
謂女士也生後公一年歿先公六年葬陽城德峯西
康基里負庚之原公歿合窆焉一男胤周業文詞五
女婿校理李世瑾李希稷進士鄭熙周趙興彬李根
胤周三女長適李義豐李世瑾三男二女男長挺柱
進士李希稷一男一女鄭熙周二男一女女長適洪
昌迪李根二男一女側出男命周女適申得胤余李

淑人之甥也知公不可謂不淡而今觀李校理所撰
狀文益知其所未知謹撮其大略敘次如右以遺胤
周俾刻于石銘曰

內辨而外質尚以聚者耶行高而位屈局於命者耶
吾守吾真全以返兮祔以碩媛貴彤管兮孝子翼翼
思闡發也德美流長視此碣也

郡守李公坡墓碣銘 并序

故觀察使李公諱尚逸以清標雅望顯 仁 孝朝
當賊臣自黷濁亂抗言請竄直聲震一時有三丈夫
子公其第二也弱冠中司馬經學文才爲泮中翹楚

人以遠到期之數奇不第終於郡紱識與不識無不
嗟惜公初名增後改以坡字子陵星州之李以高麗
碧珍將軍息言爲上祖簪纓代承至我朝有諱約
東以學行清節爲士林領袖有諱紹元文佐郎越一
世而有諱碩明郡守有諱敏善縣令兩世俱贈參
判寔觀察公之祖彌也妣固城李氏司果儀女大司
憲柳公景淡之外孫也公生於崇禎辛未八月二
日乙巳爲禁府都事例遷尚衣別提移司憲府監察
爲親爲松羅察訪已而棄歸辛亥還金吾郎出爲昌
寧縣監時歲大饑公竭誠乳哺民無餓殍故事名以

饌直日供綿布一疋公到卽減之凡係民隱有如櫛
垢疢癢道臣上其治績有陞敘命甲寅丁巳連居
外內憂庚申復拜監察俄以工曹佐郎監定山縣數
月罷還甲子爲工曹正郎丙寅移礪山郡守未幾以
道伯親嫌遞己巳以後謝歸星州甲戌夏化卽除淳
昌守三年以事罷自是十餘年終老林泉戊子四月
廿日考終於鄉家始葬善山先塋下丁酉十月十七
日改窆于星州南五十里所也面旗足里午向之原
公孝性天得奉養二尊竭其誠敬多有人所不及者
每於親瘠輒不食不寢一日慈夫人疾劇濱危公涕

泣禱于北斗旋獲神效人謂誠孝所感衰境連喪哀
毀如一日疏食一菜不聽加味而卒無疾病聞者異
之律身儉約衣安布素食不重肉口不言貨利一點
墨不費於乞字兄弟分異厚讓而薄取屢典郡邑不
增一衣嘗曰家世廉清恐墜先德教子孫有法自能
食能言必令拜跪恭恪言語婉曲撫愛親戚曲有恩
意有求輒應不厭頻數待人接物和氣滿容而如見
過失峻責不饒其莅邑也處事精密聽斷無滯首訪
民間善事親者遺以養老之物選邑中士子勸課講
習以至成就嚴束姦強撫恤窮殘所至皆有沒世思

記性甚敏公私故實氏族源派靡不貫穿雖未嘗以
文辭自任筆勢浩汗應猝不停晚好朱子書手不釋
卷草法亦豪逸而人有求者笑而不應松篁梅柳倚
杖逍遙嘯詠自娛意想閒適嘗築草舍三間扁以懲
魚蓋取諸貪餌之戒也人或勸其復仕則曰兩子食
祿榮已足矣吾復何求也淑人李氏廣平大君之後
掌令 贈贊成迴之女年十二失恃素食終喪抱養
乳妹如成人王母趙夫人奇愛之旣行舅姑曰是賢
婦也黨族曰是女士也居家有規度雖幼孫穉婢不
敢以戲語慢態侍於前粗通文字而淡自藏晦趙夫

人弟滄江公嘗戒諸女曰此爾曹之所當師也年六十二歿於辛未其葬與公同塋有二男志奭正郎志尹縣令側出一女爲許輅妻正郎二男道恆道亨三女適崔孟孫尹德龜參奉柳恆明縣令六男道光道興道昇道疑道弘道曾一女適宋英相嗚呼若公之行之備古人與儔有才不偶靡有怨悔儻所謂任真推分安於不求知者耶然宗門式之鄉黨化之皆以公爲模範公雖蠖屈其有補於世道也不淺矣余少公十歲而公以世契之重嘗弟畜之五十餘年相與采切知公之詳莫余若也今縣令君之託以墓文有

以也撫往悲酸何忍以不文辭遂爲之銘銘曰

報生盡誠猗孝德持廉嗣世潔如玉儒林循吏不媿筆孝子鑿珉名不沫

監役俞公命賚墓碣銘并序

慈教堂俞公命賚弼卿以其生年之周甲壬辰四月四日歿于京第時余病伏清風山谷中不能趨哭靈筵爲詩一百四十言以寄哀焉旣而其孤廣基持狀謁余于三百里之外泣請墓文曰知吾先人者莫如子敢以是託之余受而讀之不覺涕簌簌下也噫吾尚忍銘吾友哉亦何忍不銘吾友哉公祀溪人也祖

曰觀察使 贈左贊成諱省曾考曰觀察使 贈吏
曹判書諱梲母曰恩津宋氏直長時煜女公始生判
書公得異夢仍錫名焉四歲而孤叔父大憲公撫愛
如已出母夫人亦女士也口授小學通鑑等書浸染
薰陶若榮公之於中國夫人也既又就堂叔參判公
學嚴於課誦味於講解同隊化服十七束脩于九菴
先生之門先生一見許以可教公親炙日久間見益
博間治舉業出入公車而意恆不屑也甲寅見時事
大非盡室入丹陽布衣葛巾日徜徉水石間又從先
生於蓬山謫中益究性理諸書歸復築室於楊山先

墓下奉親治農日與學徒晨夕講誦及庚申以後朝
野清明公出遊士友間華聞藹藹一時爭傾嚮之俄
而世道潛鑠斯文將危公又身任士論激揚淑慝士
林倚以爲重然世多有側目者先生嘗移書戒之曰
不量時勢隻手障瀾非道理也又引程子知時識勢
語以勗之己巳先生受後命世變益罔極公開門彞
客含章自貞手書磨堯堅三字于座右以見志蓋取
徐侍郎壁上語也甲戌天運回泰而公適病瞶自廢
遂絕世念平居却掃一室教誨諸子曰吾今已矣爾
輩須孜孜慎毋絕讀書種子又植四槐於庭以效王

晉公故事或有勸之仕者輒笑不答庚寅親友之在
銓地者惜其虛老始除四山監役辭以病不就蓋公
以名門華胄不喜聲利專心向裏其志可謂不淺而
不幸身嬰痼疾未能充其遠大之業方且守分固窮
樂而無悔則豈區區祿仕可以易其介哉觀於公落
落君民志之句可知其所存矣公臨歿無一語及他
事唯思念母夫人諄諄發於吟嚙計出遠近相識莫
不驚悼曰正士亾矣是歲七月壬寅窆于抱川天柱
山神勒寺故址申向之原新卜也俞氏爲東方大姓
上祖義臣著節麗初其後冠冕奕世屢百年不絕有

景安公汝霖肅敏公絳官皆正卿有大名於中

明兩朝生諱泳郡守郡守生諱大儀 贈吏曹參判

寔贊成公之禰也公娶潘南朴氏承旨世城之女生
四男長卽廣基次廈基俱進士次度基次應基一女
適進士趙鼎彬孫男彥鐸彥鎰彥銓彥鎬皆長出餘
幼未錄公天稟旣美早從大賢爲終身師法故其動
靜云爲粹然一出於正性又至孝事母夫人盡其愛
敬自少至老服勤不衰凡於志物之奉多有人所不
能及者自以幼時受教於慈闈實兼父師之恩當其
屋成於楊山也請所以名其堂者先生扁以慈教而

并爲之記公之取號職由於此始判書公元配柳夫人無嗣取堂從子命夔爲後後配宋氏生公遂命承主宗事蓋倣國典而遵先志也公旣長稟於師席依胡文定家法讓宗於命夔君子多公處義至擬於荆蠻之節奉先慤勑自宗兄歿後宗祀日益零替公經紀庶事扶護宗孫不令有窘色定祭式務中豐約又行四時常祭以矯世俗弊習喪餘之日哀慕如袒括時篤於宗族待人不設畦畛人皆悅而慕之蓋其子諒雅性然也少治詞賦風流乎有屈宋遺韻晚好儒家書自經傳以及宋儒諸文靡不研索最喜朱子大

全恆置案上參以先生所著劄疑交致其功小學家禮二書尋常講服如啖茶飯若太極圖說西銘四勿箴皆諷誦而淫液焉公嘗受刻苦二字於先生箴而張之潛心服膺豈公晚年得力皆從此二字中出來耶噫老先生教人不啻搥血棒痕而至今門下諸人未聞有一事之體得者獨公能不負師誨卓然爲君子人躋哉天旣生如此人似若有意於世而顧乃坎壈沉晦齋志入地嗚呼惜矣余少與公忘年定交情意之歡白首如一日記昔辛巳春公一棹溯上訪余於寒水齋又訪直齋李公於寒碧樓畱連撥討復續

昔日麗澤之樂于時春物正新公入丹丘仙巖余病未偕焉嘗謂吾輩雖已衰老重謀此會豈無後日孰謂此會不再而公與李公已不可見耶俯仰乾坤獨立踽踽常有人世絕絃之悲今於銘公之辭書其所感於中者如此使公有知必莞爾而笑也銘曰河南門下晚有思叔妙歲讓宗聞風孤竹隱見隨時孝慈爲政德美內充源溪流永翼翼令嗣樹碣幽堂故人銘詩千秋耿光

寒水齋先生文集卷之二十七

